



Yesux Koe Alo Ka Kawncau Mausoi

အသင်းတော်အတွင်းတန်သတ်ထုတ်ဝေသည်

Crazy one

**YESUX KOE
ALO KA
KAWNCAU MAUSOI**

Son ceucao mai pwi ceucao khawmuik
(27-8-2007)

Lox Chawk

1.Siyiex sum ceucao koe: piang haktiex son pa tix lie?

(Mathiex 16:18)

2.Siyiex laug ti teei ka cao sidieex mai pwi ceucao son kaing pa tix?

(Yohan 15:16)

3.Siyiex nhie ex tawx 10 son tix son, son pa tix?

(Malakhix 3:10)

4.Yamin ceucao mai pwi yumrhawm yuh pa tix lie?

(1 Kawrinthux 6:20, 7:23)

5.Yamin sang yuh ex kaing yuh ka mawx lie?

(Mathiex 28:19-20)

6.Mawh yuh ex kaing li tawx lox bwan ka dee mawx lie?

(Kawneau 16:6-10)

7. Mawh sang jah ex ti yuh yam mawx lie?

(Lex Kab 27:1)

8.Ceucao khankix hoik yuh krax gau gumlox phuk lai sigang khri

daux ceucao lie? Phan: ang nyang yuh sang yuh lai mawx lie?

(Mathiex 28:19-20)

9. Ceucao hoik ploi pwi yuh kaing li tawx lox bwan lie? Phan: ang nyang ploi, sang ploi bawg yam mawx lie?

(Mathiex 28:19-20)

10.Phan: ang rhawm yuh, pa ang yuh kaing inkix, mawh sang chix nawh lie?

(Romax 10:14-15)

11.Phan: kawn pwi ang yaox ti mhong grawng krax moh Siyiex mai krax taoh Yesux sang lih koe yuh ka mawx lie?

(1 Kawrinthux 9:16)

12. Phan: yuh kaing jhaw Siyiex, sang pon ceu pa tix lie?

(Yohan 12:26; Plak Jhi 3:21)

Khaix hoik phat lai in khawmuik, rawg bwan ap tokiau tix ka Siyiex, mai baox kieh ex yuh kaing pa nhie Siyiex ceucao mai pwi yumrhawm khankix yuh heue.

Kaing lai

Grawhgrawng

Pakngai lai

1.	Lox khyox khaw	i
2.	Pa tawx krax keud grawng sawn	ii
3.	Lox tawm cao tiem lai	iii
4.	Lox tawm Rev. Ai Nap Khun Nyi	v
5.	Yesux simie tix kieh pwi yumrhawm khankix mawh kawncau mausoi Tix	1
6.	Kok kawncau mausoi mawh khrityan	3
7.	Kawncau mausoi cic Cao khrit	5
8.	Kawncau mausoi baux ju dix	7
9.	Gumlox pa ting ceu (4) gum	15
10.	Grawhgrawng pa kox kix kawncau mausoi mawh khrityan	21
11.	Dee bleeh khrityan	21
12.	Krax pa tang siyox kawn khrit	22
13.	Kawn Khrityan baux ju in	24
14.	Kaing pa yuh kawncau mausoi khankix	26
15.	Kham mhai sakse ka daux bawg yam pa dawd	33
16.	Ceucao mai pwi ceucao caw ti hu tawx loxbwan gauxrhwam gauxrhi yamin	35
17.	Pa nhie ex hu mai pa tiebtie ex ang hu ka dee yuh kaing jhaw Siyiex	37

LOX KHYOX KHIW

Khyox khaw ka ex ka daux ceu kaux Cao khrit heue. Yuh bwanson, coca phat ka lai in kukaux daux pwi, cao sidiex cao gau mai pwi ceucao khawmuik, sonsang cox khre ex son kaing jhaw Simiang Siyiex daux bawg yam pa sang hoek yuh ka mawx heue. Phan: ex ceucao Vax mai can pwi yumrhawm khawmuik ang dux diang tix daux kaing jhaw Siyiex, sonsang tah hoek loxbwai ka ceu pwi Vax, mawh sang chix hoik giex going lie? Ex kawn sang yaoox ti tawx ngawh tete heue. Kheu hoik laug Siyiex ka ceucao Vax mai ex pwi yumrhawm khawmuik heue.

Baox khyox khaw ka ex kukaux, phan: ang sang lang, ang sidawng, ka dee bleeh lai in, phan: ang mawh nan, phan: ang khaw rhawm kah, yuh bwanson tiem lai, pao lox hoek ka cao tiem lai in liak. Kheu hoik mawh los phuk lai sigang khri Siyiex, chix ti chawk ka sara cao sidiex pa koe daux ceucao khankix heue.

PA TAWX KRAX KEUD GRAWNG SAWN

1) Ceucao khawmuik, caw ti gau gumlox bwan Siyiex daux ceucao, daux nyiex ma. Grawng kawncau mausoi, grawng rawgbwan, grawng krai lox bwan gauxrhawm gauxrhi, mai grawng 10 son tix son ku twah heue.

2) Ceucao mai pwi yumrhawm khawmuik, phan ex ang ih gumlox Siyiex, ang ex chix haok huan yuh kaing jhaw Siyiex ka kaing tang ceu heue. Kheu nan, sonsang haok huan ceucao mai pwi ceucao ka daux pa yuh kaing jhaw Siyiex, ex ang lai chix ti mawh ceucao pa ot awm prim, hoik khaw ti tieh loh tix tete telai heue.

3) Kheu hoik sidaing gla yuh ex bawg yam tom nie nie glang ka in dix, paw lai baox tok baox sileed bawg yam, koe kaing yuh ex yuh phai phai, phan ang chix yuh nong nong hak paox tix kah, cubcaw ceucao baux veng, numli Vax hoik koe dex ex jheeng jheeng heue.

4) Ang lai chix ti baox yuh awm ceucao 20 baux siyieh num kheu ang pwi tix kaux kawx lai ot ka bawg yam an, mawh kheu hoik ot ex daux 21 baux siyieh num, kieh ex yuh awm ceucao baux in, kieh siduad, kieh huâng, kieh guu, kieh yuh kaing, kieh ploi pwu hu, kieh ting riang daux krax rawg bwan heue.

5) Ex simie ti cie ceucao, cubcaw ceucao baux veng numli ting, mawh kheu ang ex lai sang ot daux diag kaing prim pa hoik rheung yuh, pa ang cu ti kieh ex haok huan kaux cong ang mawh lie? Mawh kheu nan:, baox dux diang ex hu: baox tix ghlawk heue. Kieh pwi khawmuik koe bech glawm daux kaing jhaw Siyiex liak. Mawh kheu Siyiex hoik tawx numli ka ex, phan ex ting bwan son ka Siyiex, ex caw ti yuh kaing Siyiex ku ceucao ku kaux pwi ceucao heue.

Lox Tawm: Cao Tiem Lai

Mawh kheu bwanson krax caorfawm Siyieks pa kied ting kijed lhaong ka piang ju ex, tokaux aux yaox ti tiem lai, grawng kawncau mausoi, yaogyaw bwanson Simiang Siyieks, cao pa tawx bwanson, sonsang pon yuh ex kaing jhaw Nawh Cao heue. Bwanson Siyieks mawh pa daox pa am: tete telai, grawhgrawng nawh, ka daux pa mawh ex pwu pa iak riang iak rao, Nawh tawx riangrao ka ex, mai baox cau baox shiao ka ex, son kaing jhaw Nawh tom: singaix heue.

Lai pa tiem aux grawng kawncau mausoi in, ang mawh pa that aux lih khaing phuk lai tang dah, mawh pa tang pon aux riangrao tix, mai pa jhi Khwan Cao ka aux, yam haok ex krax gau tau mai Sara Dueng daux Pyin Oo Lwin, 2007 num, khix daix (7-9) singaix heue. Mawh kheu nan ting bwanson ka sara Mr. Dueng mai cao toe: lox Sara U Aaron Shwe mai Sam Lao Pao heue. Can ceu pa pon aux riangrao tix khaing dee gau ex tan, aux sidaing khaw caw rhawm rhi kah, mai keud nawh mawh pa koe bwanson son ceucao mai son pwu ceucao khawmuik, mai aux coca ti tiem lai grawng kawncau mausoi in:, yuh lih mawh phuk lai iak tix phuk heue.

Cao pa teem aux tiem lai in ka computer (cag dong) mai pa teem aux cied dee lud, mawh Sara U Aaron Shwe heue. Phan: mawh cao pa teem aux yuh kieh mawh lai khawmuik khawm leeing, mawh Sara Dueng mai moeng nawh Saramuix Jimni heue. Aux kied sidaing ting bwanson ka can kix cao pa teem pa coi ka aux son lai in kukaux daux pwu heue. Khaixa an:, aux kiled ting bwanson ka can ex tax yiex miex keeing, puxaik puxo, paoxgrawm paox grux, daok dawn kawn praxia, mai paox pa rom ti yuh kaing tau ka daux cao Khrit ku kaux daux pwu, can pa rieb ti phat lai in khawmuik heue.

Sivoe in dix, tokaux aux hoik sax tiem lai (6)phuk heue. Lai pa hoik sax tiem aux mai yuh mawh phuk lai iak, mawh awm pa koe ceukaux plak greem tin: heue.

- 1) Ceucao pa sum piang Cao Khrit
- 2) Krax bung kwang kaing ceucao
- 3) Kao son tix son mawh cie Siyieks
- 4) Kao son tix son
- 5) Siyieks mawh mawx?
- 6) Grawhgrawng rawgbwan

Yam in: aux baox tiem *Yesux koe alo ka kawncau mausoi*, kheu keud aux ti koe: bwansosn, son kaing jhaw Siyieks heue. Phan: mawh lai pa deeh thit ti toe lih khaing lai pwu tang kaux kawx, hoik yuh aux (4) phuk heue. Pa tang tiem tokaux cao aux, tom: hoek bawg in, hoik koe: (7) phuk phao heue. Ting bwanson ka keeing ex Siyieks Cao pa tawx riangrao ka ex ku jheeng jheeng heue. Mawh kheu sidaing iak riangrao aux plak mau khri, aux ang sax pon yuh phuk lai tom nie, mawh kheu nan viang hoik tiem lai (7) phuk kawx, pwu tiblah ang tau ti sax yaox ti phat heue. Pwi tiblah teu hoik sax phat, viang mawh nan, teu hoik pi awm ka lai an: heue. Kheu mawh kawn phuk lai iak, ang tau ti deuh tawng heue.

Viang mawh nan, khyox khaw ka ex kukaux, phan: mawh phuk lai *Yesux koe: alo ka kawncau mausoi* in, yuh bwanson coca phat tom hoik mai teei riang rao kah liak. Phan: koe: dee lud loc: tawx krax keud krax sawn ka ex teem ex cox liak. Lheu khaing an:, rawg bwan son ex, sonsang baox pon yuh ex pa lheu grum mhawm khaing in, khaixa in sax liak.

Ka daux kaing jhaw Siyieks

Rev. Ngox Khun Pen

LOX TAWM REV. AI NAP KHUN NYI

Yaogyaw bwanson Siyiex, kheu kaing jhaw pa tawx Nawh Cao ka ex, tom singaix heue. Yam in, kaing jhaw Siyiex, nie lheu ting ceu son ex, khaing glang ka singaix pa hoik luan heue. Bawg yam ting ceu kaing jhaw Siyiex son ex yuh nin, sonsang mawh ceu pa jhi daux krax ka son ex, mai sonsang mawh pa baox pon ex riang rao pa khraox son ceucavo mai son can ex pwi ceucavo khawmuik, Rev. Ngox Khun Pen, coca ti tiem lai grawng Yesux Koe Alo Ka Kawneau Mausoi, mai yuh mawh phuk lai iak tix phuk, mawh riang rao son kaing jhaw Siyiex, mai ting bwan son tete heue.

Lheu khaing an, ting bwanson ka cao pa teem nawh tiem lai in ka cag dong (computer) mai pa teem nawh yuh mawh phuk lai tom hoik, pa mawh paox pa rom yuh kaing daux Cao khrit, Tax sara *Duong* mai moeng nawh saramax *Jinni*, mai sara *U Aaron Shwe* mai ting bwanson ka can ex pa rieb phat ka lai in, mai teei riang tix sonsang baox pon yuh kaing jhaw Siyiex daux bawg yam pa sang hoek kukaux daux pwi heue. Kieh Siyiex nawb bwanson ka piang, ex khawmuik jheeng jheeng liak.

Rev. Ai Nap Khun Nyi
Cao Jhawp Kaing Ting
Numli Vax Kawn Khrit Comrawm

YESUX SIMIE TI KIEH PWI YUMRHAWM KHANKIX MAWH KAWNCAU MAUSOITIX

Mawh kheu nan pex hu, mai kieh ceu pwi khawmuik mawh kawncau mausoi Aux, mai baptis kix ka danx ceu kaux Keeding Cao, Kawn Cao, mai Khwan SingaxSingeh Cao heue. Mai gau kix kieh kix hawt yuh ceu pa hoik nhie Aux ka pex khawmuik, mai jhak heue. Aux tag ot tau mai pex jheengjheeng, tom: sidah sidu hoek bwgyam sidah haktiex heue. (Mathiex 28: 19-20).

Yesux simie ti kieh pwi yumrhawm khawmuik mawh kawncau mausoi eie Tix heue. Mawh kheu Yesux koe alo ka kawncau mausoi pa hawt khaix Nawh heue. Yesux simie ti kieh pwi yumrhawm khawmuik, mawh kawncau mausoi pa yuh kaing pa hoik yuh Nawh Cao khankix heue. Pwi yumrhawm khankix, ang nyang hoek ghlawk kawncau mausoi, kheu pwi yumrhawm khankix, kawn ca awm ngie kawn ngie, kawn iak tix kaux, pa ang nyang koe riang rao grum naog, pa kawn ih rawm teeh, pumawh pwi pa ang nyang riex nyang kwa heue. Phan: mawh kawncau mausoi kie nie, mawh pwi yumrhawm pa hoik ting lhaong haokhuan, pa ang lai mawh pa ih rawm teeh, pa mawh pwi pa ih priex kwa, mai pa koe riangrao, pa yuh kaing ceu pa hoik nhie Cao khrit heue. Yam phat ex ka phulkai sigungkhri pa hoik tiem ti deuh plak piang tin, ex pon ti tawng grawng pa koe alo Yesux ka kawncau mausoi khankix heue, Nawh Cao nhie kawncau Nawh khankix hur, mai kieh ceu pwi khawmuik mawh kawncau mausoi Tix heue. Grawhgrawng nawh, kheu Nawh ang joeng sang kieh pwi, mawh pwi yumrhawm ngie, Nawh sang kieh pwi yumrhawm khankix mawh kawncau mausoi Tix heue.

Can pwi pa yumrhawm khankix, phan: nawh ang yuh kaing pa noik yuh Yesux, mai: kaing pa hoik gau hoik nhie Nawh ka kawncau Tix, ang chix kok Nawh mawh kawncau mausoi, kheu kawncau mausoi mawh pa yuh kaing pa hoik yuh Nawh Cao, pa

hawt khaix Nawh jheengjheeng, pa cu pa nghied ka lox Nawh, pa im ju son Nawh, pa im ju tang Nawh, pa yuh alo Nawh Cao ku singaix heue. In khankix mawh kawncau mausoi pa koe alo Yesux kah heue.

KEUD KA GRAWNG IN

Maix hoik mawh nang kawncau mausoi son Yesux khrit tix kaux lie? Phan: ang mawh nan, mawh kawn ca mawh ex pwi yumrhawm giex going, pa ang nyang yuh kaing pa nhie Yesux khankix lie? Phan: ex ang nyang mawh kawncau mausoi pa yuh kaing son Yesux, mai phan: kawn ca awm kawn ngie pa ang grum naog riangrao, pa kawn ca ih rawm teeh jheeng, pa ang chix ting chix lhaong an, ex caw ti yuh ti mawh kawncau mausoi pa yuh kaing son Yesux, pa hoik grum die huan, pa grum naog riangrao, pa im ju son Yesux, pa hawt yuhkaing pa gau pa nhie Cao khrit, pa im ju tang Cao khrit heue. Yesux ang lai koe alo ka pa mawh ex pwi yumrhawm giex going ngie, koe alo ka pwi yumrhawm mai pa hawt khaix Nawh Cao ku singaix, pa mawh kawncau mausoi pa chix cu chix nghied, pa mawh kawncau mausoi pa mhawm heue.

KOK KAWNCAU MAUSOI MAWH KRITYAN

Mai kix khrawm ti ot tau mai ceu cao tan, tom naog tix num, mai sidlex gau ka pwi tom nie, mawh ka daux veng Antink, dee jah ti kok kawncau manusoi khawnkix, marwh krityan phaoka heue [Kawneau 11:26]

Phan ang mawh kawncau mausoi, ang chix kok mawh krityan heue. Yam jah ti kok kawncau mausoi mawh krityan dix, jah ti kok mawh ka daux veng Antiuuk heue. Mawh kheu pa tix, kix chix jah ti kok kawncau mausoi khankix mawh krityan lie? Mawh kheu kawncau mausoi khankix, sidaing viex rhawm kwa tix, kham mhai sakse grawng krax taoh Yesux khrit, mai yuh awm pa hoik gau Yesux ka kawncau Nawh khankix heue. Kix ih rhawmrhi khri mau paox tix, kix grum naog mai Khwan Cao, mai kix kaux cong ka daux krax yumrhawm, mai kix kieh pwi tom nie yumrhawm ka Yesux khrit, mai viex pwi tom nie boek ka Simiang Siyix heue. Yam yoax pwi pa ang nyang bax yumrhawm, pa ang nyang sax tawng ka Siyix khankix ka krax im ju kix, kix sidaing dnox deng, mai kok ceukaux kawncau mausoi khankix mawh Krityan ka daux veng Antiuuk heue.

Yam an: pwi yumrhawm ka Yesux khankix, ang lai ot giex going, ang mawh pwi yumrhawm pa ot giex going pa ang yuh kaing, pa yuh alo nex nham, kix mawh pwi yumrhawm, pa im ju awm pa thong gau Yesux khrit, mai yuh kaing pa nhie Cao khrit pwi yumrhawm khankix yuh, mawh kheu nan pwi tang kaux khankix tom kok ceukaux kix mawh Krityan heue. Krityan pa ah nan, sang ah ka pa hawt khaix Yesux, awm pa im ju son Yesux heue. Phan ex pwi yumrhawm khankix yumrhawm ngie, mai ang yuh kaing pa nhie Cao khrit ex yuh, ex ang doh chix ti mawh krityan heue. Krityan pa ah nan, ang lai sang ah ka pwi yumrhawm geu gam giex going ngie, mai ang tie cu nghied ka lox krai Simiang Yesux, sang ah ka pwi yumrhawm pa to rug yumrhawm, pa chix hawt yuh ka kaing pa yuh Yesux, mai pa im ju awm pak peung im ju

Yesux heue. An mawh Khrityan tete heue. Ka piang haktiex in pa ceep ceu kaux khrit koe tom nie heue. Khrityan tiblah mawh pa twah singaix twah mai ang yuh kaing panhie Yesux rawh yuh heue. Khrityan tiblah mawh pa rawgbwan son tokaux cao tix mai ang tawng ka pa nhie Siyiex nawh rawg heue.

Khrityan tiblah mawh pa fahrhawm ka pa hoik com tix rawm, mai pa ih pwie Cao tix khix tix bawg ngie heue. Khrityan tiblah mawh pa fahrhawm ka pa hoik yuh tix kaing pa mhawm, mai pa tawx krax tan mai kao: son tix son heue. Khrityan tiblah mawh pa gauxrhawm yuh krax pyaw bawg yam pwie khritmas ngie heue. Can khrityan pa yuh nan khankix, mawh khrityan pa ang rug mawh khrityan te pa mawh pwi yum rawm pa ang rug mawh pwi yuh rhawm tete telai, pa mawh pa ceep ka ceukaux khrityan pa ang im ju awm khrityan heue.

Pwi yumrhawm pa mawh kawncau mausoi, pa kok mawh khrityan khankix, mawh pa kaux cong krax yumrhawm pa kaux sijax tom yum ti heue. Mawh pa krai grawng Yesux ka pwi pa ang sax mhong khankix, mawh pa kham sakse pa yuh Siyiex daux ju pa im tokaux tix ku singaix heue. Kix mawh pa ting riang daux krax pa phat phuk lai sigang khri ku ngawb ku bo, mawh pa ting riang ting rao daux krax rawg bwan ku ngaix ku sawm, mawh pa chix tawng ka bwanson Siyiex ramraux moxmox, mawh pa chix yaog yaw ka bwanson Siyiex kadaux kuceu, mawh pa viexrhawm rien ti yuh kaing jhaw Siyiex khawm rhawm khawm rho tix tete, mawh pa koe rhawm krax moh krax rhawm daux kaing Siyiex, mawh pa koe rhawm sibieh ti tan lu teem ka kaing jhaw Siyiex, mai ka pwi pa lo khankix, mawh pa eunghiet ka gumloox Siyiex mai tawx kao son tix son, mawh pa hoik kaux rhawm fahrhawm ka grawng hoik pon tix krax taoh, pa ang lai lhat ka krax yum, pa mawh pa im ju ka daux pa thong bung Khwan Singax Singeh Cao ka tix, mai mawh pa hawt khaix Yesux tom sidah ju tix heue.

KEUD KA GRAWNG IN

Ot maix daux ghlawk pa yuh ka mawh lie? Phan: maix ot daux ghlawk pa mawh pwi yumrhawm, mai ang nyang mawh kawncau mausoi, maix ang nyang chix ti mawh khrityan heue. Kheu pa jah ti kok mawh kawncau mausoi khankix mawh khrityan, ka daux veng Antiuk dix, mawh kheu mawh kix pwi yumrhawm, pa hawt khaix Yesux, pwi tangkaux tom kok ka kix mawh khrityan ang mawh lie? Awm an, pwi yumrhawm pa chix ti kok mawh khrityan, mawh pwi yumrhawm pa ting krax yumrhawm pating riangrao daux pa yuh kaing jhaw Siyiex, pa krai grawng krax taoh ka pwi pa ang tawng ka Yesux, pa im ju son Yesux, pa mawh kawncau mausoi khankix heue.

KAWNCAU MAUSOI CIE CAO KHIRIT

Mawh kheu nan, awm hoik rieb ti teei Yesux khrit pa mawh Simaing, hu: ka daux Nawh heue. Kieh koe riah mai kieh sum haokhuan ka daux Nawh Cao, mai kieh krax yumrhawm pex kaux cong awm pa hoik gau ka pex, tau mai krax yaogyaw bwanson pa kreh heue. [Kawlawsie 2:6]

Kawncau mausoi cie Cao khrit, mawh pa hoik klop hoik hich krax im ju tix khawmuik ka daux Cao khrit heue. Pa im ju nawh khawmuik hoik een hoik sawn mawh cie Cao khrit heue. Viang nawh sipup pa nu pa yie pa yuh ka mawh kawx ang ah, kheu hoik rieb ti teei ka Yesux mawh Simaing tix, nawh hu ngie ka daux Cao khrit khaing heue. Nawh sum riah tix ka daux Cao khrit, nawh chix haok huan khaing tix ngaix hoik tix ngaix heue. Kheu nawh kieh krax yumrhawm tix kaux cong ka daux Cao khrit, nawh ang chix goh ka daux phimap tix bawg kawx, viang goh tix bawg bawg, tag kaoh dom mawh dom an: heue.

Kawncau mausoi pa hoik kok kix mawh khrityan phaoka, kadaux veng Antiuk dix, kheu pwi tang kaux yaox ka kix awm yaox

kix ka Cao khrit, mai kok ceukaux kix mawh Khrityan heue. Phan pwi tix kaux kaux, pa yumrhawm ka Yesux tete telai, kheu nawh hoik pon krax im ju tix khawmuik ka daux Cao khrit, ang lai een lai sawn tokaux tix mawh cie tokaux cao tix, nawk een nawh sawn tokaux khawm ju tix khawmuik mawh cie Cao khrit heue. Pwi mawx ang ah, pa hoik een hoik sawn tokaux tix mawh cie Cao khrit, mai hawt khaix Nawh ku singaix, pwi an: mawh kawncau mausoi cie Cao khrit heue. Kawncau mausoi cie Cao khrit, mawh pa gauxrhawm gauxrhi ka daux pa yuh alo Siyiex heue. Ang lai gauxrhawm daux alo nex nham, kheu nawh ang lai mawh cie alo nex nham kheu nawh hoik mawh cie Cao khrit heue.

Yam im ju kawn pwi piang haktiex in tivud ticiu, mawh pa kied ting ceu son ju khaix , pa mawh ju leeing ju leeing phan heue. Baux pa im ju kawn pwi tivud an, pa laug ex ti cie mawh pa yuh ka mawh lie? Koc Cao son ex ra kaux, tix kaux mawh Cao Taoh Simiang Yesux, mai tix kaux mawh phicaox pa seeing pa brai heue. Pwi mawx ang ah, pa yumrhawm ka Yesux, mai hawt yuh alo Nawh, mai im ju son Nawh, im ju daux Nawh, ang lai kieh tang ceu mawh pa ting daux ju tix lheu khaing Yesux, kieh Yesux mawh Cao kwang piang ju pa im tix khawmuik, im son Yesux, yum son Yesux, yuh son Yesux, ku singaix tom sidah ju tix, pwi an: mawh cie Yesux khrit heue.

Pa im ju hawt alo nex nham, pa im ju hawt alo tokaux cao tix, pa im ju daux pa gauxrhawm gauxrhi haktiex, mawh pa yuh alo phicaox mai pa mawh kawn phicaox mai mawh cie phicaox heue.

Pex jhak ngie ka grang plak praix khaing lie? Phan tix kaux kanux yumrhawm ka tokaux tix gravng mawh cie Cao khrit, kieh nawh baox deeh loi keud ka tokaux tix, gravhgravng awm mawh nawh cie Cao khrit, viang ex kawx mawh nang iee Cao khrit heue. [2 Kawrinthux 10:7]

KEUD KA GRAWNG IN

Phan ang im ju daux Yesux, phan ang im ju son Yesux, phan ang im ju hawt khaix Yesux, sang chix mawh cie Cao khrit yuh ka mawh?

Hoik klop hoik hieh maix krax im ju tix khawmuik ka daux Simiang Yesux lie?

Phan: yuh alo cao tix, phan yuh alo nex nham, phan deuh krax gauxrhawm haktiex mawh pa ting daux ju tix, pwi an, mawh cie phicaox heue.

Kawn ca ceep ex ceukaux khrityan mai yuh alo phicaox ku singaix lie?

Kaw pa pex, tag sang pon ti cie sin ceu in khankix heue. Mai aux tag mawh Siyiex nawh, mai nawh tag sang mawh kawn Aux heue. [Plak Jhi 21:7]

Viang mawh kawx nan ka son pa lhat pa graung, mai pa ang yumrhawm mai pa greeing, mai pa mawh pa pah pwel yun, mai pa mawh pa phit pa vao, mai pa mawh pa yuh simeed yuh sat, mai pa mawh pa krub rieng krub rao khankix mai can pwi pa mawh pa pia pa lhen khawmuik, nyhum cie kix tag mawh ka nhawng pa gleeing ka ngu mai mhat, pa mawh krax yum ra bawg tix bawg heue. [Plak Jhi 21:8]

KAWNCAU MAUSOI BAUX JU DIX

1) Kawncau mausoi ju dix, ting riang daux krax rawgbwan

Mawh kheu pwi yumrahwm khankix, hoik yum rhawm ka lox tawm Yesux ti deuh pa ah nin, Rawg heue, mai tag sang tawx ka pex, sawg heue, mai pex tag sang yaox. Gleuh sivieux heue, mai tag sang paoh son pex heue. Grawh-grawng nawh, pa rawg kukaoux tag pon, mai kaw pa sawg tag yaox, mai ka kaw pa gleuh sivieux, tag paoh son nawh heue. [Mathieu 7:7-8]

Ceu pa lih bleeh khaing krax yumrhawm pwi yumrhawm khawnkix, pa jah tix ceu an, mawh krax rawg bwan heue. Kheu krax rawgbwan mawh lox pa tawm Yesux ti deuh, mai mawh pa teei ex riangrao tix khaing Siyiex, mai mawh pa ot ka daux Simiang Yesux khrit heue.

Pwi yumrhawm phaoka dix, ih rhawm rhi khrimau paox tix, rawgbwan khawn rhawn khawn rhi tix heue. Mawh kheu kix ting riang daux krax rawg bwan, mai ih rhawn rhi khri mau paox tix, kix pon jhan rieng sinax pa faik, mai pon jhi grawng pa ting siawp sibrawm Siyiex kudah kudee, mai kix pon kham geu ka pa nu pa khawn, mai pex ka pa nyaw pa glaw heue. Kawncau mausoi, mawh pa ting riang daux krax rawgbwan heue. Jah kuceu ka krax rawg bwan, yuh kuceu ka daux krax rawgbwan, im ju daux krax rawgbwan, kieh krax rawgbwan mawh pa ting ceu khaing paox tix, mai een rhawn teei riang rao daux krax rawgbwan heue. Phan ang rawg bwan, kix ang yuh tix ceu kaww heue. Kheu kix een kix sawn, krax rawgbwan mawh pa ting piang can pa yuh tix khawmuik, mai een sawn mawh pa jah mai pa ghoik khaix heue.

KEUD KA GRAWNG IN

To rug mawh maix pwi pa rawgbwan khawmrhawm khawmrhi tix tete telai lie? Phan ang mawh nan, mawh maix pa kawn ca rawgbwan, awm pa yuh pwi piang haktiex, pa dex dawd mai alo nex nham lie? Pwi yumrhawm pa rug mawh kawn Siyiex tete, rawgbwan ang jud ang jai, phan ang rawgbwan ang chix ot, phan ang rawgbwan ang chix im ju heue. Awm lox krai Yesux daux phuk lai sigang khri pa ah nin: “*Grawhgrawng nawh, phan pex tang tiah khaing Aux, pex ang chix yuh tidtix heue*” [Yohan 15:5]

2) Kawncau mausoi baux ju dix ih rhawmrhi khri mau paox tix

Can pwi yumrhawm pa mawh kawncau mausoi ju dix, kix ih rhawmrhi khri mau paox tix, koe krax moh krax rhawm ka paox tix, eu nghiet lox krai paox tix, mai grum rhawm grum rhi daux kaing ceu pa yuh tix khawmuik heue. Ex hoik pon ti tawng grawng pwi yumrhawm pa mawh kawncau mausoi pwi ju dix yuh nin: heue.

Cub pwi haoh pvi hun: pa yumrherwm, mawh rhawmrhi tix mu khaing, mai tix kaux kaww ang ah kraung pa koe tix mawh cie tix, viang mawh nan, kix rom paox tix shao ceu pa koe khawmuik heue [Kawncau 4:32]

Krax pa ih rhawmrhi simau paox tix, mawh pa jhi grawng mawh Siyiex krax moh krax rhawm heue. Sivoe kix ang nyang bax krai grawng Siyiex ka pwi tang kaux, pwi hoik dha ti yaox krax moh kix ka paox tix, mai hoik tawng Siyiex pa krub kix mawh Siyiex krax moh krax rhawm heue. Mawh kheu kawncau mausoi baux ju dix, chix ih rhawmrhi khri mau paox tix, mai rom ti hawt khain Yesux khrit tau, ka daux pa chix eu chix nghiet, mai ang tang lox, ang siyox moeng, pwi pa ang yumrhawm khankix pon riangrao ka kix, mai pwi tieh loh ti hock ka Simiang Siyiex, dom mawx dom an, yam yaox pwi krax im ju kix pa miawm mai yam mhong pwi ka lox bwan gauxrhawm gauxrhi grawng krax taoh Yesux khrit heue.

KEUD KA GRAWNG IN

Phan: kawncau mausoi pwi yumrhawm pa mawh kawn khrit baux ju dix, chix ih rhawn paox tix, ex pwi yumrhawm baux ju in, ang chix ih rhawn paox tix yuh ka maww lie? Mawh kheu ang ex cu nghied ka lox krai Yesux pa ah nin;

Phan Aux mawh simiang mai sara cao gan, hoik khoek caong pex, viang pex kerex , khaw ti khoek caong ka paox tix, tix kaux hoik tix kaux heue. [Yohan 13:14]

*Mai pex tix kaux lai tix kaux caox rhawm ti yuh pa
mharwm ka paox tix, mai viex pa awn rharwm awn rhi, mai pluat
ploi phimap ka paox tix, awm hoik pluatploi Siyex phimap pex
ka danex Cao khrit heue. [Efesux 4:32]*

3) Pwi yumrhawm pa mawh kawncau mausoi baux ju dix, naog
mai Khwan Singax Singeh, sidiex loxbwan gauxrhawm gauxrhi

*Mai kix khawmuik naog ka Khwan Singax Singeh, mai
jah ti sikah ka daux lox tang ceu khankix, awm pa tawx khwan
kix sidiex heue. [Kawncau 2:4]*

Pwi yumrhawm pa mawh kawncau mausoi baux ju dix, kix naog mai Khwan Singax Singeh, mai sidiex gum loxbwan gauxrhawm gauxrhi heue. Kix ang mawh cao sidiex, kix ang haok cawng camlig (cawng phuk lai singang khri) kix ang koe lekmad awng krax gau, kix ang ih riang khix, yuh ka mawx, kix lai chix pon sidiex gau gumloks bwan gauxrhawm gauxrhi ku singaix lie? Kheu kix naog mai Khwan Singax Singeh Cao, mai Khwan Singax Singeh Cao thong gau ka kix, kix tom pon sidiex gau gumloks bwan gauxrhawm gauxrhi heue. Pwi yumrhawm khawmuik, caw ti mawh pa hoik pon Khwan Singax Singeh heue. Ang lai mawh cao sidiex nongnong khaing pa pon Khwan Singax Singeh, mawh pa pon pwi yumrhawm khawmuik kah heue. Phan ah ti mawh kawn khrit, phan ah ti mawh pwi yumrhawm, phan ah ti mawh khriyan, caw ti hoik pon Khwan Singax Singeh Cao teete telai heue. Phan ang pon Khwan Singax Singeh Cao, ang chix ti krai tokaux tix mawh khriyan, kheu khriyan khawmuik, caw ti mawh pwi pa hoik pon Khwan Singax Singeh heue. Pwi mawx ang ah, phan nawh hoik yumrhawm ka Simiang Yesux tete telai, mai baptis ka daux ceukaux Kelsing Cao, Kawn Cao, Khwan Singax Singeh Cao, pa mawh Siyex Loe kaux Tix kaux, Khwan Singax Singeh lih hoek ka piang nawh mai ot ka daux nawh jheengiheeng heue. Khaix an, pwi yumrhawm an, lih mawh

kawncau mausoi, mai kham sakse krai gum lox bwan, gauxrhawm gauxrhi heue. An to rug mawh kawncau mausoi heue.

Kawncau mausoi ju dix, naog mai Khwan Singax Singeh kheu tawx kix dee ot Khwan koe vieh va ka daux rhamrhi Khwan ju tix heue. Khwan Cao yuh kaing ka daux kix, kix ang chix ot giex going, kix krai gumloks bwan gauxrhawm ku singaix heue. Kix hoek dee mawx ang ah, kix krai gumloks bwan gauxrhawm gauxrhi heue. Kix ang kaig kix ang lhat, kix ang krien, kix ang khi, kheu naog kix ka Khwan Singax Singeh Cao heue. Kix ang krai lox bwan, kix ang chix ot, kix ang krai lox bwan, kix ang chix im ju heue. Kheu hoik tiem daux phuk lai singang khri ah nin; “Nüed ti coca, yuh ka mawx sonsang pon maix ti tawx tokaux tix ka Siyex, pa mawh pwi pa hoik cheu ti yaox, pa mawh pwi yuh kaing pa ang koe dee kaig tua, pa chix gwieh ka gumloks pa mawh pa meh awm pa khaw heue.[2 Timose 2:15]

KEUD KA GRAWNG IN

Can pwi pa tawx dee ot Khwan Singax Singeh Cao, koe daux rhawmrhi ju khwan tix, Khwan Singax Singeh tag sang ot daux nawh, mai kwang ka krax im ju nawh, mai nawh pon siawp sibrawm, mai tag sang krai gumloks bwan gauxrhawm gauxrhi heue. Baux ju yam in, Kawnkhrit tom nie yuh alo tokaux tix, hawt krax gauxrhawm haktiex heue. Kheu jao pa yuh nan, Khwan Singax Singeh Cao, ang chix yuh kaing, kheu alo Khwan mai alo nex nham mawh pa lah pa cha ka paox tix awm pa tiem ti deuh daux phuk lai singang khri pa ah nin;

“Aux ah nin, hu ka daux Khwan heue. Pex tag ang yuh ti kieh alo nex nham grum naog heue. Grawhgrawng nawh alo nex nham mawh pa lah pa cha ka Khwan, mai Khwan mawh pa lah pa cha ka alo nex nham, mawh kheu ceu in, kiex mawh pa ang khaw mai paox tix, tom ang pex pon yuh ceu pa simie pex ti yuh heue. [Katalatix 5:16-17]


4) Pwi yumrhawm pa mawh kawncau mausoi baux ju dix ih gumlox
Siyiex tau, mai baox deeh thawk ti gau ka pwi tang kaux

Mai kix khrawm ti ot tau mai ceucão tan, tom naog tix num, mai sidieb gau ka pwi tom nie, Mawh ka daux veng Antluk, dee jah ti kok kawncau mausoi khankix, mawh khriyan phaoka heue. [Kawncau 11:26]

Can pwi yumrhawm pa mawh kawncau mausoi ju phaoka dix, kix ang nieb pon yuh sipe lie sivoe, ang nieb teei rhawmrhi alo cao tix, kix phat phuk lai sigang khri tau, mai kix gau gumlox Siyiex kadaux nyiex bwan, mai ka daux nyiex kix heue. Kix yuh kaing patix ang ah, kix krai grawng krax taoh, yam mawx dee mawx ang ah, kix krai awm pa hoik yaox hoik mhong kix ka daux phuk lai sigang khri heue. Grawhgrawng nawh, awm po koe daux lai pa jah ex ti phat plak piang nux, kheu kix mawh pwi pa ih gumlox bwan Siyiex, tom ci'vix deeh thawk ti gau ka pwi tang kaux heue. Ka daux nyiex bwan ang ah, ka daux nyiex kix angah, kix sidieb gau grawng Yesux mawh Cao Taoh, ka pwi tom nie ang jud ang jai heue. Phuk lai tiiem ti deeh ah nin:, "Mai ku singaix kix sidieb gau grawhgrawng Yesux mawh Cao Khrit, ka daux nyiex bwan, mai ka daux nyiex kix, ang jud ang jai heue. [Kawncau 5:42].

Phan ex ang gau gumlox Siyiex, ex ang chix tawng alo Siyiex heue. Gumlox Siyiex mawh kraung naing son pwi yumrhawm, mai mawh priex ju priex khwan heue. Phan gumlox Siyiex ang koe ka daux ex kawn khrit, phan ex ang phat gumlox phuk lai sigang khri, phan ex ang gau ka gumlox bwan, ex ang chix koe gumlox bwan sonsang tawx ka pwi tang kaux heue. Ex ang koe ceu pa gau ka pwi gum lox bwan heue. Sonsang pon gau chix gau ka pwi tang kaux khankix, tokauz cao ex, caw ti mawh pwi pa phat phuk lai sigang khri ku singaix, mai ih gumlox Siyiex heue. Phan yuh nan, tom chix thawk ti gau kieh pwi tang kaux tawng heue. Pwi yumrhawm pa mawh kawncau mausoi khankix, caw ti mawh pwi pa rieb gau gumlox Siyiex, mai caw ti mawh pa thawk ti gau ka pwi tang kaux heue. In mawh lox tawm jhawm krai Simiang Yesux heue. [Mathiex 28:19-20]

Pakpeung pa krai lox bwan awm in plak green



Sonsang mhong pwi piang hakties in khawmuik, grawng krax moh Siyiex mai krax taoh Simiang Yesux khrit, mawh bee hlawm pa ting ka son ex heue. Caw ti krai kukaux ku ceucão, caw ti krai ku singaix ku jheeng jheeng, caw ti krai kudah kudee, mai caw ti krai ka pwi kuceu ku ru, mai kukaux ku pwi, mai ka piang hakties in khawmuik heue. Sonsang chix krai, lo ti gau, sonsang chix gau, lo ti baox gau heue. Kieh pwi yumrhawm mai kawncau mausoi khawmuik baox thawk sitee ti krai pwi tawng grawng loxbwan gauxrhawm gauxrhi Siyiex heue. In mawh kaing pa ang yuh ang chix, kheu hoik mawh lox tawx sibrawm Simiang Yesux khrit, ka kawn khrit, mai ka ceucão heue. Mawh kheu jao an: cao Pawlux tom baox ah nin;

Pa sidieb aux loxbwan gauxrhawm gauxrhi, ang koe dee yaw tix kah, grawhgrawng nawh, hoik tum piang aux, mai phan ang sidieb ang doh pon, phan aux ang sidieb gumlox bwan gauxrhawm gauxrhi, aux tag sang pon pa kharhawm kharhi heue. [1 Kawrinthux 9:16]

Can ex kawn khrit khawmuik, can ceucão khawmuik, phan ang sidieb ang gau lox bwan gauxrhawm gauxrhi, ex hoik teh thiang gumlox pa tawm Yesux ti deuh, pa hoik mawh lox tawx sibrawm ka son pwi yumrhawm khawmuik. Pa yuh nan, lih ti mawh krax kharhawm, son pwi yumrhawm, mai pwi ceucão khankix heue.

5) Kawncau mausoi pa kok mawh khrityan baux ju dix, rhuad roi gumlox bwan, mai sum ceucao khraox

Khaix hoik haok Simiang Yesux khrith daux meung raoma, cub kawncau Nawh, mai pwi pa yumrhawm ka Yesux khrith khawmuik, ih rhawm rhi khriinau paox tix, lox tix gum cum tix dah, mai viex rhawm kua ti rawg bwan, mai sidieks gau grawng krax taoh Yesux ka pwi khawmuik heue. Jah bwgyam an, tix singaix hoik tix singaix, pwi yumrhawm niied ti pre haoh hun heue. Kheu kix cu nighiet ka lox pa tawn Yesux ti deuh ka kix, mai kix hu ti sidieks lox bwan gauxrhawm gauxrhi, jah ka daux veng Yerusalem daux pawie Pientekote, pwi yumrhawm kiied nie hu sinyek mai ceucao Cao khrith jah ti lih koe ka daux bwgyam an, ka daux veng Yerusalem tan heue. [Kawncau 2:1-13]

Khaix an tix baux hoik tix baux, pwi yumrhawm khankix sidieks gau gumlox bwan gauxrhawm gauxrhi, mai baox sum ceucao khraox tix mu hoik tix mu heue. Khaix an, ceucao deeh baox sum ka ceucao khraox, tix mu hoik tix mu heue [Kawncau 11:22-26]. Beeh glawm kaing pa ting pu lhaong khaing kuceu, pa mawh lox tuwm Yesux ti deuh ka kawncau Nawh khankix mai pwi yumrhawm khawmuik, mawh pa nhie kix hu ka piang haktiex in kudah kudee, ka pwi kuceu kuru, mai krai lox bwan gauxrhawm gauxrhi, mai sum ceucao pa mawh tokaux Yesux khrith heue. Grawhgrawng pa lih koe pwi yumrhawm mai ceucao piang haktiex in, mawh sonsang rhuad roi gumlox bwan gauxrhawm gauxrhi ka kawn pwi, mai sonsang sum ceucao ka piang haktiex in kudah kudee heue. Beeh glawm kaing in khankix, mawh pa caw kawn khrit mai ceucao khawmuik ti seeb toe ti yuh ku bwgyam, ku jheeungjheeeng, mai kudah dudee heue. Phan ang yuh kaing in, ang chix ti kok mawh kawn khrit mai ang chix ti kok mawh ceucao heue. Kheu in mawh kaing pa caw kawn khrit pwi yumrhawm mai ceucao khankix khawmuik ti yuh tete telai, ang yuh ang chix heue. Phan ang yuh kaing pa rhuad roi lox bwan

gauxrhawm gauxrhi, mai kaing pa sum ceucao, ceu pa lih mawh ex pwi yumrhawm, mai pa lih koe ceucao, koe dee bleeh pa tix, koe bwanson pa tix, in mawh lox chawk pa caw ti chawk ka tokaux tix ku kaux ku jheeung jheeeng heue.

KEUD KA GRAWNG IN

Baux ju yamin, jalao khrityan sum ka ceucao, baox ti ghrawm ti mawh pa ting khaing paox tix ka daux ceucao ang mawh lie? Pa yuh nan, mawh pa ghrawm dee ot Cao khrith, kieh dee ot Cao khrith mawh dee ot tokaux cao tix heue.

Pwi pa sum ceucao haok huan, mawh pa sum tokaux Cao khrith heue. Pwi pa yuh ti ting ka daux kaing ceucao, mawh pa yuh ting piang Cao khrith heue.

Ceucao baux ju in plak nie, mawh ceucao pa yuh grang haktiex heue. Mai tan 10 son tix son mai mau tan daux ceucao, hoik lih mawh son kaing kawn pwi, ang lai mawh son kaing jhawwatsana heue. Hoik yuh pakpeung ceucao mhsawm grang plak praix, plak daux ceucao, hoik naog ka pa seeing pa brai heue. Ka daux phuk lai sigang khri hoik tiem ti deuh grawng ceucao veng Lawdikix ah nin:...

"Aux tawng grawng krax twah krax klaung maix, grawhgrawng pa ang maix tie sikiied, tie hax, mai Aux simie ti kieh maix mawh pa sikiied, phan ang mawh nan, pa hax heue. Mawh kheu mawh maix pa siu ngie ceeix ceeix khaing, mai pa ang tie hax, tie sikiied, Aux tag peh ti tik maix khaing daux jheeh Aux heue. [Plak Jhi 3:15-16]

GUMLOX PATING CEU (4) GUM, SON PWI YUMRHAWM MAI SON CEUCAO

Gumlox in (4) gum, mawh kox pa ting ceu khaing kuceu khawmuik heue. Phan ang lai keud lai sawn ka dee bleeh gumlox in, mai ang lai hawt yuh, tag sang mawh krax kharhawm kharhi leeing ju leeing phan ka son ex heue. Gumlox in mawh pa caw ti keud

sawn, mai pa caw ti hawt yuh tete telai heue. Gumlox in ang lai dex mai can ceu pa koe ka piang haktiex in pie tix ceu kawx, mawh pa shiang pa dex mai meung raoma, mai mawh pa shiang pa dex mai ju leeing ju leeing phan heue. Mawh kheu nan, tom krai gumlox in mawh pa ting ceu khaing can pa koe kuceu khawmuik heue. Kieh ex phat ti tawng mhawm mhawm, mai keud sawn daux rhawm rhi tix mhawm mhawm, mai hawt yuh mhawm mhawm liak. Gumlox pa ting ceu (4) ceu an, mawh in pa koe plak green heue.

GUMLOX GUM TIX

1) Gumlox pa lih hoek khaing plak piang (Meung raoma)

Gumlox pa lih hoek khaing plak piang, mawh gumlox Yesux, pa mawh simiang Siyiex pa ting piang kuceu khawmuik heue. Gumlox an ah nin: „

“ Mawh kheu nan pex hu mai kieh ceu pwi khawmuik mawh kawncau mausoi Aux, mai Baptis kix ka daux ceukanx Keeing Cao, Kawn Cao, mai Khwan Singax Singeh Cao heue. Mai gau kix kieh kix hawt yuh ceu pa hoik nhie Aux ka pex khawmuik, mai jhak heue. Aux tag of mai pex jheeng jheeng, tom sidah sidu hoek bawgyam sidah haktiex heue” [Mathiex 28:19-20]

Gumlox in, nhie ex pwi yumrhawm mai ceucacao hu krai pwi mhong lox bwan gauxrhawm gauxrhi, mai kieh ceu pwi khawmuik mawh kawncau mausoi Cao khrit heue.

In mawh lox tawx sibrawm pa ting khaing kuceu ku cawng, pa mawh lox krai tokaux Simiang Yesux, pa mawh lox pa hoek khaing plak piang, daux meung raoma long heue. Phan mawh kawn khriyan pa rug mawh kawn Siyiex tete, ang chix ti teh thiang ka lox in tix buwg kawx heue. Kheu mawh lox tawx sibrawm pa nhie Yesux ka can pwi yumrhawm pa mawh kawncau mausoi khawmuik heue. Lox in mawh son ceucacao, mai son can pwi pa yumrhawm pa koe khawmuik khawm leeing heue.

Gumlox in, ang mawh pa chix ti teh thiang, ang mawh pa chix ti sidien, ang mawh pa chix ti tuhtieh, ang mawh pa chix ti cox,

ang mawh pa chix ti tok bawgyam. Mawh pa caw ti cu nghied tete, mawh pa caw ti hawt yuh tete, mawh pa caw ti niied yuh tete, mawh pa caw ti yuh lung yuh loi, tom tawx pong ju tokaux tix heue. Mawh kheu mawh lox pa knoh khaing plak piang, pa mawh pa kaoh khaing raoma, pa mawh lox krai Simiang pa ting ka piang khawmuik, pa mawh Yesux khrit, pa tawx lox sibrawm ka ceucacao, mai kawn khrit khawmuik khawm leeing heue.

Lox tawx sibrawm pa hoek khaing raoma, mawh pa ploj ka ceucacao mai ka pwi yumrhawm khawmuik, hu ka pwi haktiex, sonsang krai lox bwan gauxrhawm gauxrhi, mai sonsang kieh pwi mawh kawncau mausoi, mawh sonsang sum ceucacao eie Cao khrit.

GUMLOX GUM RA

2) Gumlox pa lih hoek khaing plak green (Mawnarhok)

Gumlox pa lih hoek khaing plak green, mawh lox pa kaoh khaing meung mawnarhok, pa mawh lox krai pwi tix kaux, pa hoik yaox ti kham geu daux mawnarhok dom in heue. Gumlox an ah nin: „ Mai caomi an baox ah nin, Keeing eue, phan mawh nan, aux khyox ka maix, kieh Lazarux hu ka nyiex keeing aux liak. Sonsang hu nawh ti kham mhai sakse ka kix heue. Mawh kheu aux koe puxaik phwan kaux, phan ang mawh nan, ha kix kawx, hoek ka dee kharhawm kharhi tin heue. Viang merwh kawx nam, Abraham ah nin, kix koe Mose mai cao jhai khankix, kieh kix nghiet lox kix heue. Mai kaw an baox ah nin, ang merwh, keeing Abraham eue, viang merwh nan phuan tix kaux pa hoik yum hu ka kix, kix tag sang doh keud doh sawn ka phimap tix heue. Mai Abraham baox ah nin ka nawh, phan kix ang nghiet Mose mai Cao jhai khankix, viang pwi tix kaux deeh kaoh khaing krax yum kawx, kix tag ang cu ang nghiet ka lox nawh heue. [Lukax 16:27-31].

Grawhgrawng in, mawh grawng cao mi pa ting rhawm ka piang krax im ju tix piang haktiex, mai Lazarux pwi hot pa yumrhawm ka Siyiex heue. Kieh yum khawm ra kaux, cao mi pa

yuh ti ang tawng krax im ju pa tawx Siyiex ka tix, hoek meung mawnarhok, pwi hot Lazarux pa yum rhawm ka Siyiex, hoek meung Siyiex dee hoik ot Abraham heue.

Cao mi an kiied kharhawm, rawg akhwang ka Abraham, nhie nawh ploi Lazarux ing ka paox nyiex puxaik nawh, pa kawn koe piang haktiex heue. Nhie nawh krai kix mhong grawng pa kiied kin kharhawm nawh daux meung mawnarhok, sonsang tieh loh kix ti yunirhawm ka Siyiex, mai sonsang im ju kix ka daux alo Siyiex heue. Viang mawh kawx nan, Abraham krai ka nawh grawng hoik koe, cao jhai mai Mose ti krai ka kix heue. Cao mi pa ot daux mawnarhok an, baox ah nin, phan pwi pa hoik yum deeh ing ka kix, kix tag sang doh keud ka phimap tix ah nan heue. Abraham baox ah nin, phan kix ang nghiet ka lox Mose mai cao jhai, kix ang tau ti nghiet lox pwi hoik yum deeh ing hoek ka kix heue.

In mawh grawng ceu pa caw ti sawn rhawm rhi tix kah, mhawm mhawm heue. Lox in, mawh pa hoek khaing mawnarhok, mawh lox krai pwi pa hoik ot tan heue. Mawh lox pa lhat graung ka piang ceu pa lhat graung khawmuik heue. Mawh lox pa kieh pwi pa im ju piang haktiex yamin, doh keud ka phimap tix, mai kieh im ju son Siyiex heue. Mawh lox pa kieh pwi haktiex khawmuik cu nghiet ki gumloxi Siyiex pa krai kawncau mausoi Siyiex cao sidieks khankix heue. Kaining ting piang paox tix, mawh lox pa kieh kawn khrit kulaux khawmuik krai grawng meung raoma mai grawng meung mawnarhok ka can pwi pa koe piang haktiex in khawmuik, sonsang mawh pwi, pwi yunirhawm pa mawh kawncau mausoi cie Cao khrit heue.

Phan ex pwi yunirhawm mai ceucavo ang lai keud sawn grawng gumloxi pa kaoh khaing plak greem in, mai ang krai pwi mhong lox bwan gauxrhawm gauxrhi, ka kawn pwi haktiex, pwi sang pon tawng grawng meung mawnarhok lie? Ang tau chix tawng heue.

Gumloxi pa hoek khaing plak greem, mawh lox pa kieh kawn pwi tawng grawng meung mawnarhok, mawh pa yuh ka mawx, mai pa kieh ceucavo mai pwi yunirhawm khankix, hu ti krai ka haktiex uik heue. [Phat Lukax 16:19-31]

GUMLOX GUM LOE:

3) Gumloxi pa lih hoek khaing plak praix (Meung Madedonix)

Gumloxi pa lih hoek khaing plak praix, mawh gumloxi pa kok yo meung Makedonix, sonsang hoek lox bwan gauxrhawm gauxrhi ka kix heue. Gumloxi an, mawh pa pon cao Pawlux riang susai khaing Siyiex, awm pa koe daux phuk lai sigang khri pa tiem tin plak greem heue.

Yam pon sawm, Pawlux yaox rieng susai pa yuh nin, Tiang ti hoek ka Makedonix mai teem ex liak. Mai khaix hoik yaox nawh rieng susai an, dom mawx dom an, ex khru khrieh sawg ti sang yaog ti hu ka daux meung Madedonix, kheu ex yiag Siyiex hoik kok ex, sonsang sidiex gau loxbwan gauxrhawm gauxrhi ka kix heue. [Kawncau 16:9-10]

Yam pon cao Pawlux a rieng susai, sonsang kock ka kix, sidiex gumloxi bwan gauxrhawm gauxrhi, kix ang lai pau ang lai tok bawg Yam, kix hu dom mawx dom an, kheu kix hoik pon rieng susai, grawng pa kiied hot kiied simie, meung Makedonix ka gumloxi bwan heue. Awm an, ka piang haktiex in kudah kudee, kiied hot kiied simie pwi ka los bwan gauxrhawm gauxrhi, mai hoik kok hoik yo ka pwi yunirhawm, mai ka ceucavo khawmuik heue. Phan ex hoik tawng, mai hoik yaox grawng pa kiied lo kiied simie pwi ti mhong lox bwan gauxrhawm gauxrhi yuh nan, mawh kawn sang baox ot ex yuh nin, mai ang hu ka kix lie?

Pwi pa sang hu daux meung mawnarhok, kheu ang kix sax mhong grawng krax taoh Yesux, kiied nie ka piang haktiex in kudah kudee heue. Son ang pwi haktiex sang hoek daux mawnarhok, Siyiex tawx beeh glawm ka ceucavo, mai ka pwi yunirhawm khankix ang mawh lie? Phan ceucavo khankix, mai phan pwi yunirhawm khankix yuh ti ang tawng, ti singaix sax ex kawn sang yaox ti pon pa chawk cheng Siyiex ka tix, siwoe dangngeung Nawh Cao heue. Sonsang mhong kawn pwi haktiex grawng krax taoh Yesux khrit, Siyiex hoik laug ti teei ka ceucavo, mai ka pwi yunirhawm pa mawh kawn khriyan khawmuik heue. Kadaux bawg Yam singaix in, ka piang haktiex in

kudah kudee, pwi pa kawn ot daux pa faik, pwi pa kawn ot daux pa seeing pa brai phimap, pwi pa kawn krub riangrao, pwi pa kawn hawt khaix alo nex nham, pwi pa kawn een rhawm ka kaing pa mhawm pa yuh tokaux tix, sidaing nie tete telai heue. Kix hoik kok yo lox simum, mai kix kok yo ka ceucao mai ka pwi yumrhawm khankix heue. Ka piang haktiex in, mai ka daux ceu pwi **Vax** tom nie, hoik kok yo ka ceucao mai pwi yumrhawm, sonsang kieh ex hoek krai lox bwan gauxrhawm gauxrhi ang mawh lie? Awm pa pon Pawlux riang susai, grawng pe kok Madedonix ka kawncau baux ju dix, Yam in ex hoik pon riang susai grawng pwi ceu ex, pa ang nyang sax mhong grawng krax taoh Yesux, hoik kok ka ex ang mawh lie? Awm yaog kix ti hu dom mawx dom an, kieh ex niied yaog ti hu ka pwi ceu ex dom mawx dom an, mai tawx loxbwan gauxrhawm gauxrhi hu ka kix yamin heue.

GUMLOX GUM PON

4) Gumlox pa lih hoek khaing plak daux (Daux rhawmrhi pwi yumrhawm)

Gumlox pa lih hoek khaing plak daux, mawh gumlox pa kaoh khaing daux rhawm rhi cao Pawlux, pa mawh pwi pa koe rhawm ti taoh ju pwi, khaing daux phimap heue. In mawh lox pa kaoh khaing rhawm pwi pa moh ka khwan pa grai, mai pa moh ka Alo Siyandex heue. Mawh lox pa tang lih hoek ka daux rhawm rhi pwi yumrhawm khankix, mai mawh Khwan Singax Singeh Cao, kieh so ka daux rhawm rhi ex heue. Gumlox kaoh khaing plak daux an, mawh lox pa ah nin,

"Pa sidiex aux lox bwam gauxrhawm gauxrhi, ang koe dee yaw tix kah, grawhgrawng nawh hoik tum piang aux, mai phan aux ang sidiex ang doh pon. Phan aux ang sidiex gau lox bwam gauxrhawm gauxrhi, aux tag sang pon pa kharhawm kharhi heue." [1 Kawrinthux 9:16]

Can ceucao mai pwi ceucao khawmuik, song sivieh rhawm rhi tix, mai ang cu ti tawx akhwang, pa laig Khwan Singax Singeh ti

yuh kaing daux rhawmrhi tix heue. Mawh kheu nan, gumlox pa kaoh plak daux an, ang cu ti lih hoek ka dee koe pwi pa ang nyang sax mhong grawng krax taoh Yesux heue. Phan yuh nan, awm pa hoik yaox ex daux phuk lai sigang khri plak piang in, tag sang pon pa kharhawm kharhi heue. Can pwi pa ah tokaux tix mawh kawn Siyandex, mai pa ah tokaux tix mawh khrityan, pa ah tokaux tix mawh pwi yumrhawm khankix, caw ti mawh pwi pa pon gumlox pa kaoh khaing plak daux, mai pa ploj lox bwam gauxrhawm gauxrhi hu kudah kudee heue.

GRAWHGRAWNG PA KOK KIX KAWNCAU MAUSOI MAWH KHRITYAN

Khrityan ang mawh ceukaux pa sum Yesux, ka kawn khrit khankix heue. Ang mawh ceukaux pa sum kawn khrit khankix ka cao tix heue. Ang mawh pa grum rhawm pwi hun ti tat lox dud, sonsang kok pwi ceukaux kawn Siyandex khankix mawh khrityan heue. Mawh ceukaux pa kok pwi pa ang nyang yumrhawm khankix, ka can pwi pa hawt khaix Yesux khrit heue. Mawh ceukaux pa sum pwi pa ang nyang mawh pwi yumrhawm, pa mawh pwi pa kawn ot daux pa faik, pa ang nyang tawng ka kawn khrit, pa mawh pwi ang nyang yumrhawm ka Siyandex tete telai heue. Ceukaux in, mawh pa jah kix ti kok ka kawncau mausoi, mawh khrityan phaoka, ka daux veng Antiuuk heue. [Kawncau 11:26]

DEF BLEEH KHRITYAN

Def bleeh khrityan, mawh pwi pa hawt khaix Yesux, mawh pwi pa hawt jhawh ti yuh awm Yesux, mawh pwi pa yuh krax im ju tix, awm krax im ju Yesux khrit heue.

Def bleeh khrityan mawh pa hawt khaix Yesux heue. Ju yam an dix, can pwi yumrhawm ka Yesux khrit khankix, kix hawt ti yuh awm pa yuh Yesux heue. Kix krai lox pa krai Yesux, kix hu krax

pa hu Yesux, kix hawt jhawh been pa deuh Yesux, mai kix hawt alo Yesux ku singaix heue. Mawh kheu jao pa awm kix ka Yesux, pwi tang kaux pa ang mawh pwi yumrhawm khankix, tom kok ceukaux kix mawh khrityan heue. Yam jhak pwi tang kaux khankix ka kawncau mausoi, kix awm pakpeung Yesux, krax ot krax koe kix awm Yesux, krax im ju kix, jiet chix awm pa gau Yesux heue. Mawh kheu jao an:, pwi tang kaux kok ceukaux kix mawh khrityan heue. Hoik awm lox pa hoik krai Yesux ti deuh pa ah nin: "Aux mawh pa rieng haktiex heue. Kaw pa hawt khaix Aux, tag ang hu ka daux pa faik, nawh sang pon pa rieng pa im ju heue". [Yohan 8:12] Baox phat mai kleuk ti yaox tau mai [Mathiex 5:14] "*Pex mawh pa rieng haktiex heue*".

Phuk lai sigang khri in (2) baux, daux lai Yohan Yesux krai tokaux Cao Nawh mawh pa rieng heue. Khaix an daux lai Mathiex, Yesux baox deeh krai kawncau mausoi pwi yumrhawm khankix mawh pa rieng heue. Mawh kheu Yesux mawh pa rieng, pa rieng an, laig daux pwi pa yumrhawm, mai hawt khaix Yesux, kix kawx baox lih mawh pa rieng awm Yesux heue. Mawh kheu jao grawng pa yuh nan, pwi tang kaux tom yaox kawncau mausoi kix, awm pakpeung Yesux mai kok kix mawh khrityan heue.

KRAX PA TANG SIYOX KAWN KHRI

Baux ju dix, kawn khrityan khankix, sidaing kaux cong krax yumrhawm kix tete telai heue. Kix kham krax pa phyawk pa laung pwi, mai krax pa tap toi pwi, mai krax pa tuktiaktukte pwi, kheu ceukaux Yesux khrit jheeng jheeng heue. Bawg tiblah kix kawn yaox ti kham geu krax pa pah yum heue. Kadaux krax pa yaox kix ti kham geu krax tuktiaktukte kuceu yuh nan, kix kaux stjax tom yurn tix, mai krai loxbwan gauxrhawm gauxrhi ang jud ang jai kudah kudec heue. Kix ang yaox ti ot mhawm ngawm singeh, kheu haktiex koeng ka kix, kix tom prung prang rairuad kkdah kudee heue. Viang mawh nan, kix hoek dee mawx ang ah, kix ang sax reed sax riem ti

bawg kawx, mai kix ca niied pot, ti krai gumlox bwan gauxrhawm gauxrhi ku jbeeng jheeng heue.

Kawncau mausoi baux ju dix, chix ih rhawm rhi khrimau paox tix, mai chix eu nghiet lox paox tix, mawh lox tix gum cum tix mu, lox tix mu hu tix diang heue. Kix rom paox tix yuh kaing jhaw Siyiex, mai tan lu can ceu pa koe tix ka son loxbwan gauxrhawm gauxrhi heue. Kix sidaing ting riang daux krax rawgbwan, mai rawg bwan ang jud ang jai, mai kix twah po ih pa un: mai rawgbwan heue. Kix yaox ti kham geu pa yuh ka mawx ang ah, kix koe krax moh krax rhawn ka kaing jhaw Siyiex, mai gauxrhawm gauxrhi ka daux pa kharhawm kharhi jheeng jheeng heue. [Kawnau 4:31, 12:5]

Ceu pa yuh nan, mawh pa tang siyox pa koe kadaux kix heue. Kix gau paox tix ka gum lox phuk lai sigang khri, bawg tiblah, daux nyiex dee sidie, bawg tiblah daux nyiex ma pwi yumrhawm, bawg tiblah daux nyiex ti dah dah dee rom kix paox tix ot tau heue. [Kawncau 5:42]. Kix sidaing viex rawm mhawm ti gau ti phat phuk lai sigang khri, kheu kix yumrhawm ka gumlox Siyiex mawh pa ting siawp sibawm mai kix phat ka phuk lai sigang khri ku singaix, ka daux rhawm pa awn pa mhawm heue. [Kawncau 17:11,17]

Kawn khrityan baux ju Yam an dix, kix ang ot giex going, kix ang hawt yuh pa yuh pwi tang kaux, kheu mawh kix pwi Siyiex kix im ju daux pa singax singeh pa khaw pa caw heue. Kix chix gwich ti tawng pa koe alo Siyiex mhawm mhawm, mai kix yuh pa khaw mai alo Siyiex sinax pwi haktiex, tom min plakngai Siyiex lih sidaung kheu kix, ka daux sinax pwi haktiex khankix heue. Viang paox rawprim kix, yuh pa lud pa loe miex ding kawx, viang pwi tang kaux ot daux pa gauxrhawm pa yuh krax pyaw haktiex miex ding kawx, can kix pwi Siyiex khankix, ang doh yuh ti awm pwi tang kaux, kix tang siyox krax ot krax koe, mai krax im ju sinax pwi heue. Pwi yumrhawm khankix, ang joeng mawh ngie, khre ka krax ot tokaux tix nong nong, sonsang tawng pwi haktiex ka alo

Siyiex, mai sonsang mhong kix ka lox bwan gauxrhawm gauxrhi, kix viex rhawm kwa ti sidieq gau, gumloxi Siyiex ku bawg kuyam heue. Kix kham sakse krai grawng krax taoh Yesux khrit kai pwi haktiex khankix, tom yaox kix ti kham geu pa ang cee ang cag kheu lox bwan gauxrhawm gauxrhi kawwx, kix ang doh lauxrhawm ti bawg kawwx, kix niied ti gauxrhawm, mai kix ih rhawm thi khrimau paox tix, mai baox niied ti coca yuh kaing son Simiang heue.

KAWN KHRITYAN BAUX JU IN

Kawn khritian baux ju yamin tiblah, ang lai pon jhi pa rieng tix, siveo pwi haktiex, kheu ang pa rieng Yesux koe ka daux kix heue. Kawn khritian baux ju in tiblah hawt ti yuh pa yuh pwi, hawt ti ih pa ih pwi, hawt ti krub pa krub pwi, kheu ang krax yunrhawm kix kauk cong, mai kheu ang kix rice Khwan Singax Singeh ot ka daux rhawm daux rhi tix heue. Bawg tiblah, krax im ju kawn khritian tiblah, nie lbeu iak riang khaing pwi tang kauk pa ang yunrhawm khankix, kheu kix yuh alo nex nham tix grum naog heue. Pwi pa yuh alo nex nham tix grum naog, ang doh chix yuh alo Siyiex tix bawg kawwx heue. Baux ju in, kawn khritian plak nie, hoik hawt ti yuh pa lud pa loe awm pa yuh pwi, mai ang lai kieh krax im ju pa tawx Siyiex ka tix, koe ngawh jum heue. Jalao nawk chix jhi daux krax ka pwi tang kauk, nawk deeh kieh pwi tang kauk jhi daux krax ka tix, kheu jao pa hawt nawk krax gauxrhawm haktiex heue. Kawn khritian pa hawt im ju awm been haktiex, ang doh chix kieh pa rieng Siyiex lih sinai pwi, kheu pa rieng ang koe ka daux nawk heue.

Kawn khritian baux ju in tiblah, ih pa yoek pa awp ah lox ting lox vao, kawn yi koe heue. Kawn khritian tiblah sidaing chix hawt ti yuh alo nex nham, mai jiet chix im ju awm pakpeung pwi ting rhawm pwi hai heue. Pa yuh nan sang chix ti kieh pwi tang ceu mawh pa tawng ka Yesux lie? Kadaux tix singaix, kawn khrit tix kauk nyaux plai, mai kin yoek, kheu ang nawk lai tawng tictix kheu kin yoek nawk, kraung khrai ang lai koe piang nawk, pakpeung

nawh, mawh krax pa kaig tua heue. Nawh it dex krax ting, mai yo lox tix ah nin, "Siyiex eue, kheu Maix tawx aux nyaux plai ting bwanson" ah nan heue. Pwi lailing lawng krax an, ah nin ka paox tix, kawn khritian koe kix mie ceu lie? Kix krai Siyiex tix, tawx nyaux plai tiblah, tibalh kix ang cu paox tix nyaux plai heue. Yam an pwi hu lawng krax an, khaix hoik ah kix nan ka paox tix, dom mawh dom an, kies sipub pwi tix kauk, pwi an mawh kheu koe rieng khaox lhak mai sibex nawh, kaw an tawng nawk mawh kawn khritian, mai ah nin ka pwi pa koe rieng khaoxlhak mai sibex nawh an, "Yock kawn Yesux ka plai siveo maix tan, tix kauk an", khaix ah nawk nan, nawk niied ti hu khaix heue. Simaing Yesux mawh pa mhawm, pa singax, pa ang doh dex dawd mai pa secing pa brai heue. Viang mawh nan, kheu kawn khritian pa ang hawt yuh pa yuh Yesux, yuh tokauk tix lud loc, pwi tang kauk yaox ka Yesux mawh pa ang mhawm, sipiag pa yuh kawn khritian pa ang lih grawng heue.

Mawh kheu ang kawn khritian koe jhawm pa mhawm, pwi tang kauk khankix ang lai ah grawng kawn khritian, ah grawng Yesux ang mhawm siapiag ang mawh lie? Kawn khritian yam in tiblah, jalao nawk krai grawng Yesux ka pwi, nawk kawn kieh pwi ah lox map, lox nunai, ka Yesux heue. Kawn khritian pa simah paox tix siveo pwi, kawn khritian pa ang twah, mai ang rawg bwan daux singaix twah, kawn khritian pa tawx sibawg chawk jhai, kawn khritian pa tawx pwi jhak lai taix, kawn khritian pa ah ti mhawm khwan mhawm son tix, kawn khritian pa tawx phai, mai pa yuh chie, kawn khritian pa silah pa klieh mau, kawn khritian pa kawn jhak siang ia, kawn khritian pa krub simeeg khankix, kawn khritian pa kok khwan, kawn khritian pa lhat ka sjax singie, kawn khritian pa simawd miang miex sjax keeing, kawn khritian pa kawn of daux been krub haktiex, pa ang cu ti klop krax im ju tix piang Yesux, in kix, sang chix kieh pwi tawng ka Yesux yuh ka mawx? Kix mawh pa ceep ka ceukauk Yesux, mai nunai ka Yesux heue.

Kawn khritian pa yuh nan, mawh kawn khritian pa pie pa lhien heue. Pa yuh nan, kawn mawh pa ot daux pa faik heue. Pwi

haktiex sang chix pon ti tawng ka krax moh Siyiex mai ka krax taoh Yesux kheu pa yuh nan lie? Ang doh chix ti mawh tix bawg kawx.

Kawn khriyan tiblah, yuh taoh ka tosat, ang yumrhawm ka Yesux hoik kham geu ti yum mai hoik mawh Cao pa taoh tix heue. Tiblah, yuh priex pwi yum kheu ang kix yumrhawm ka gumloks pa krai Yesux heue. Tiblah kok khwan kheu ang kix yumrhawm grawng khwan kawn pwi khawmuik mawh pa shiang mai Siyiex tix kauk khaing heue. Kawn khriyan pa tiebtie phicaox ka lhax khaox, pa mawh pa vien “keen” (peer) ka piang sivieh nyiex tix, ah tix tiebtie sijax singaie ang hoak daux nyiex tix kawn koe top nie heue. Siyiex kix mawh pa yaox kix kangai heue. Sidah khaix, Siyiex payumrhawm kix, ang lai mawh, Yesux Cao Taoh, hoik lih ti mawh lhax khaox, mai simaox rang khankix heue. Ceu in khankix mawh ang kawn khrit khankix doh chix ti kieh pwi tawng ka Yesux mawh kawn Siyiex pa mhawm pa mihiem heue. Kawn khriyan khawmuik caw ti rien rhawm ka krax im ju tix sivoe pwi, sonsang chix tawng pwi ka pa mhawm Yesux khrit mai ka krax moh pa ting Simiang Siyiex heue.

KAING PA YUH KAWNCAU MAUSOI KHANKIX

1. Pa mawh kawncau mausoi mawh pa tix? [Mathiex 28:9-20]

1) Pa mawh kawncau mausoi mawh pa yuh kieh pwi pa yumrhawm khankix, mawh nyawm cawng rieb gau, pa mawh cie Cao khrit heue.

2) Pa mawh kawncau mausoi, mawh pa yuh kieh pwi yum rhawm khankix mawh, pwi pa hawt jhawh ti yuh awm Yesux heue.

3) Pa mawh kawncau mausoi, mawh pa yuh kieh pwi yumrhawm khankix mawh pa hawt khaix Cao khrit heue.

Simex ang ah, sibon ang ah, kawn nyawm ang ah, can pwi pa yumrhawm ka Yesux khankix, caw ti kieh kix lih mawh kawncau mausoi pa mawh nyawm cawng rieb gau, pa mawh pwi pa hawt jhawh ka Yesux, pa mawh pa hawt khaix Yesux khrit heue.

(i) Caw ti baox riangrao plak daux kix, mai tawx riangrao ka kix tom mawh pwi pa grum naog riangrao heue.

(ii) Caw ti gau kix ka phuk lui sigang khri heue. Gumlox Siyiex mawh ceu pa gau son pwi khawmuik heue [Kawncau 18:11]

(iii) Caw ti baox gau kieh kix tawng sidawng lhaing lhaing grawng phuk lai sigang khri Siyiex heue [Kawncau 18:26].

2. Sang yuh lih mawh kawncau mausoi ka dee mawx?

[2 Timose 2:2]

Phan gau sawn sonsang lih mawh kawncau mausoi, chix ti gau kix daux nyiex heue. [Kawncau 18:26]

Phan gau sawn, sonsang lih mawh kix kawncau mausoi, chix ti gau kix ti gau daux lawg gau lai khankix heue. [Kawncau 19:8-10]

Phan gau sawn, sonsang lih mawh kix kawncau mausoi, chix ti gau kix dee krawk khrawm pwi paox tix ot tau tix da dah heue. [Kawncau 20:20]

Cao khrit, mawh Sara ting pa gau ka cao Pawlux, mai Cao Pawlux mawh Sara pa jah ti gau ka kawncau tix heue. Khaix an, Timose mawh kawncau pa rieb ti gau mai cao Pawlux heue.

Khaix an, cub kawn nyawm pa hoik gau tix, baox deeh thawk ti gau ka pwi tang kauk heue. Khaix an, kix baox thawk ti gau ka cub kawncau mausoi khankix, tix ghlaawk hoik tix ghlaawk heue.

3. Caw ti yuh ka mawx, sonsang yuh ti kieh lih mawh kawncau mausoi | 1 Kawnrinthux 4: 14-17]

1) Cao Pawlux krai tokaux tix mawh keeing ka kix heue. Phan hoik mawh keeing, caw ti koe kawn heue. Phan ang koe kawn, ang chix ti kok mawh keeing heue. Mawh kheu nan, caw ti gau paox tix ka gumloks phuk lai Siyiex, awm keeing gau ka kawn tix, mai awm kawn cu nghiet ka lox keeing tix heue.

2) Cao Pawlux kok ka kix mawh kawn praix tix heue. Mawh kheu cao Pawlux hoik pon ju mai moh ka ju heue. Phan hoik pon ka ju pwi, caw ti moh ka ju an heue. Phan hoik keh kawn, pwi pa ang

jhak ang priex ka kawn tix, mai prah ti deuh, koe nang lie? Ang koe. Nawh tag sang priex kawn praih tix, mai tag sang kieh nawh tñg lhaong haok huan tix ngaix hoek tix ngaix heue.

3) Awm an, phan ang gau ang priex ka pwi khraox yumrahwm khankix pon ang chix tete heue. Caw ti priex ka kix mhawm mhawm, mai gau ka kix, mai kieh kix mawh pa via hukhaing phimap, mai ceu pa lud pa loe: heue. Caw ti gau kix ka ceu pa khaw ti yuh mai pa ang khaw ti yuh khankix heue.[I Kawnringthux 4:16]

Phan gau, gau grawng in khankix .

- (1) Gau kix tawng grawng Siyandex mhawm mhawm heue.
[Yeramix 11; Yaogyaw 19; Kawncau 17]
- (2) Gau kix tawng grawng pa koe sibrawm gumlox Siyandex pa mawh phuk lai sigang khri heue.
[2 Timose 3:16-17]
- (3) Gau kieh kix tawng grawng lox bwan gauxrhawm gauxrhi.[Efesux 1 mai 2]
- (4) Gau kieh kix chix tawng ti im ju daux pa singax singeh.[Kalatix 5; 2 Timose 2]
- (5) Gau kix tawng grawng ceucavo mhawm mhawm [Efesux 3; 1 Timose khawmuik]
- (6) Gau kix tawng grawng yuh naing plak khwan [Efesux 6]
- (7) Gau kix ka grawng pa tag sang deeh hoek Yesux khrit ra bawg tibawg [1 Thiesalonix 4; Yohan 14:1-4]

Pwi yumrhawm kawncau mausoi khankix [2Petrux 1:20-21]

- (1) Pwi yumrhawm kawncau mausoi khankix, caw ti mawh pwi pa sawg ti pon ka khwan heue.
- (2) Pwi yumrhawm kawncau mausoi khankix, caw ti mawh pwi moh ka khwan kawn Siyandex heue.

- (3) Pwi yumrhawm kawncau mausoi khankix, caw ti tawx satix ka pwi, ka gum lox Siyandex ku bawg ku yam heue.
- (4) Pwi yumrhawm kawncau mausoi khankix caw ti jhi pwi yaox daux krax Siyandex rah see heue.

(5) Pwi yumrhawm khawncau mausoi khankix, caw ti gau ka pwi ka gum lox phuk lai sigang khri Siyandex heue.

(6) Pwi yumrhawm kawncau mausoi, caw ti rawg bwan sonsang pooh Siyandex siviex rhawmrhi pwi mai son kuceu heue.

4. Pa gau kawncau mausoi kieh lih mawh cao thong jhi daux krax

Can pwi pa thong jhi daux krax, sonsang pre gumlox bwan ka pwi khawmuik, sidaing mawh pa ting ceu heue. Pawlux ot daux Thesalonix (4) twah mai gau ka kix ku singaix heue. Sonsang gau ex ka pwi yumrhawm kieh lih mawh kawncau mausoi, caw ti tawx bawg yam son kix khaw caw heue. [Kawn cau 18: 7, 11, 23]. Caw ti tawx riangrao kix, mai teem coi ka kix plak gumlox Siyandex heue. [Kawncau 18: 23].

Gravhgrawng pa deeh hoek cao Pawlux ka ceucavo khankix mawh sonsang gau ka kix, mai sonsang tawx satix ka kix sonsang mawh pa kaux cong daux kaing jhaw ceu pa mhawm heue. Sonsang baox lih pwi pa yuh kaing Siyandex ka daux kawn ceucavo tom nie, mawh pa ting ceu heue.

- (1) Caw ti gau ka pwi yumrhawm heue.
- (2) Caw ti ploj pwi pa yuh kaing Siyandex hu dee sidiex loxbwan gauxrhawm gauxrhi heue.
- (3) Caw ti pheuk ka kix mai cied ti tawng ka riangrao kix heue.
- (4) Caw ti teem coi son pa lo kix laohlie heue.
- (5) Caw ti baox gau ka kix mai kieh baox thié riang rao tix pa khraox heue.

- (6) Caw ti hu lailing tawx riangrao mai yuh paoxpie tau mai kix heue.
 (7) Caw ti baox rawgbwan son kix heue.

5. Kawncau mausoi rhoad simie tom nie [Makux 4:26-38]

Ceucaco mai pwi yumrhawm khawmuik, caw ti mawh pa rhoad simie lox bwan gauxrhawm gauxrhi tom nie nie heue. Phan ang rhoad simie, pon ang chix kheu beeh glawn pa tawx Siyiex ka ceucaco mai pwi yumrhawm, mawh beeh glawn pa rhoad simie gum lox bwan gauxrhawm gauxrhi heue. Mawh kheu in, hoik mawh pa tawx Yesux lox tawx sibrawm son can pwi pa yumrhawm khawmuik heue. Phan mawh lox tawx sibrawm Siyiex, ang chix ti tiebtie, ang chix ti sidien, ang chix kah kum heue. Kheu mawh lox tawx sibrawm pa kaoh khaing meung raorna heue.

Phan ang rhoad simie loxbwan gauxrhawm gauxrhi, pwi sang chix pon ti mhong gumloxi Siyiex yuh ka niuwx, phan pwi ang mhong ang tawng, pwi sang yumrhawm ka pa tix, phan pwi ang yumrhawm, pwi sang chix kok ka ceukaua Siyiex yuh ka mawx, awm pa koe daux phuk lai sigang khri [Romax 10:14-16], phan ang rhoad simie gumloxi bwan gauxrhawm gauxrhi, pon ang doh chix tete heue. Yam rhoad simie, mawh simie pa kiied iak ceeix ngie, viang mawh nan, phan hoik ting chix plix plix tom nie heue. Yam rhoad simie, koe ceu pa nu, mai koe pa suksak makmee, mai koe pa nyaw pa glaw kuceu heue. Awm pa koe daux phuk lai sigang khri pa ah nin, “Pwi pa jauh rawm ngai, mai lih hu rhoad simie khankix, tag deeh viex liem nghox hoek khawm gauxrhawm gauxrhi tete telai heue. [Yaogyaw 126:6]

Ceucaco mai pwi yumrhawm khawmuik, koe beeh glawn ti rhoad simie gumloxi bwan heue. Pa kieh kuah, mai pa kieh ting lhaong, mai pa kieh plix plix mawh Siyiex Cao phan Cao yuh ka kuccu khawmuik heue.

Lai Makux 4:26-29 Yesux krai grawng pwi pa rhoad simie heue. Pwi pa rhoad simie, sang ah ka ex pwi yumrhawm khawmuik heue. Phan mawh simie, sang ah ka gumloxi Siyiex heue. Phan mawh

tiex sang ah ka rhawmrhi kawn pwi heue. Pwi pa rhoad simie ang tawng grawng ceu pa kuah simie an, mai pa ting lhaong simie an, yam laig it nawh pon sawm, mai yam deeh kaoh nawh pon singaix heue. Grawhgrawng nawh kheu simie an pa mawh gumlox Siyiex, koe siawp sibrawm Siyiex heue. Awm an, ex tawng ngie rhoad simie ngie khaing heue. Cao pa kieh nawh kuah, mai kieh nawh ting lhaong, mai kieh nawh plix plix, mawh simiang Siyiex heue. Ex khaw ti rhoad simie gumlox Siyiex, tom nie nie heue. Kheu koe siawp sibrawm Siyiex ka daux gumlox bwan an, nawh tang kuah, mai ting lhaong yum ang ex chix tawng kah heue.

Ceucaco mai pwi yumrhawm pa mawh kawncau mausoi khankix, caw ti krai gumloxi bwan gauxrhawm gauxrhi tom nie heue. Phan ang krai, phan ang sidiex tag lih ti mawh krax kharhawm, awm pa koe daux phuk lai sigang khri heue [1 Kawrinthux 9:16]. Phuk lai sigang khri, baox tiem ti deuh yuh nin, phan ang krai mai ang tawx satix ka pwi caox pwi caig khankix, Siyiex tag sang mhaing nham kix khaing taix ceucaco mai taix pwi yumrhawm khankix heue. Ceucaco pa ang rhoad simie mai pwi yumrhawm pa ang rhoad simie khankix, tag kawn yaox ti hoek sivoe dangngeung Siyiex tix ngaih sax heue. Caw ti rhoad simie tete telai heue. Phan ang rhoad pon ang chix, caw ti rhoad tom nie, rhoad ku singaix, rhoad ku dah kudee heue. Kheu in mawh lox tawx sibeawm pa kaoh khaing Siyiex heue.

6. Krax blawng pa krai gumloxi bwan gauxrhawm gauxrhi

Ceucaco ang ah, pwi yumrhawm ang ah, yam sang krai gumloxi bwan gauxrhawm gauxrhi, caw ti rawg bwan tete telai heue. Caw ti twah pa ih mai rawgbwan heue. Khaix hoik rawg bwan baox rawb hu, mai krai gumloxi bwan rhoad simie gumlox Siyiex tom nie heue. Pwi pa hu ti rhoad simie khawm ceucaco pa ot plak khaiz khawmuik caw ti yuh lung rawgbwan tete heue. Ceu pa krai gumloxi Siyiex ka kawn pwi, mawh ceu pa koeng phicaox kah heue. Mawh kheu nam

caw ti rawg bwan tete heue. In kik mawh awm lox tawm jhawm krai Simiang Yesux khrit ka daux lai Makux 4:4-9 heue. Yam rhuad simie, simie pa cod piang krax, piang simaox, daux pang kat ankix, mawh ceu pa tuktiaktukte phicaox ka gumlox Siyiex son ang sang lih ti ting pang, lang lhax, mai son ang sang plix plix tix heue.

Yam rhuad simie gumlox Siyiex, koe daux krax daux blawng kuceu heue. Chix ti shiao krax blawng pa yuh ka mawh ang ah, chix ti shiao awm pa khaw mai krax ot krax koe, bawg mawh bawg an heue. Bawg tiblah, chix ti shiao tix bawg ra loe: ceu heue. Krax blawng an khankix mawh awm in plak greem khankix heue.

- 1) Krai grawng krax taoh Yesux, kham mhai sakse ka pwi
- 2) Jhi pwi yaox ka krax klieh - yuh pwi yaox ka krax klieh
- 3) Jhi pwi yaox ka That sing, Video
- 4) Krai awm krai been (Lox lao been)
- 5) Paoh lox daux cag kieksiet
- 6) Gau lai rhax, krai dee bleeh lai rhax,
- 7) Tiem lai mai rhuad roi phuk lai kieh pwi phat
- 8) Rhuad roi phuk lai sigang khri
- 9) Tiem lai piang ce vielh mai klied piang ding nyiex
- 10) Ploj lox daux cag bhaung
- 11) Graoh thiao mai krai lox bwan gauxrhawm gauxrhi
- 12) Jhi pwi yaox ceu pa klieh (klieh maox, klieh plix)

Pa tiem ti deuh plak piang tin, dah dee tiblah, mai bawg yan tiblah, chix ti shiao tixtaix nec na loe: ceu heue. Dee tiblah, sonsang shiao ex ka krax blawng tiblah, mawh pa nu heue. Chix ti shiao krax blawng pa yuh ka mawh ang ah, koe ka piang krax ot krax koe, pa sipub pa yaox ex dee mawh dee an, yan mawh yan an heue.

Gumlox Siyiex, phan krai pwi mhong, viang mawh tix gum ra gum kawx, mawh pa ting ceu heue. Chix ti krai miex ding, krai ding heue. Viang krai ra loe gum kawx, kheu mawh Nawh lox pa im ju, mai pa koe sibrawm, ang doh chix mawh giex going tix bawg ju,

kawx heue. Phan ang mawh tix ngaix mawh tix ngaix, teu lib kwah ka daux rhawm rhi cod ka piang dee mhawm tiex heue. Kaing ting kieh ex ea rhuad simie tom nie nie heue. Cod dee mawh ang ah, simie pa cod piang krax, simie pa cod piang simaox, simie pa cod daux pang kat, mai simie pa cod dee mhawn tiex, in khankix, kieh Siyiex mawh Cao pa cox son ex heue. Ex tawng mawh cao rhuad simie khawmrhawm khawmrhi tix ngie khaing heue. Chix pwi mawh, ti rhuad daux krax blawng pa yuh ka mawh ang ah, caw ti rhuad simie ku singaix heue. In mawh lox sibrawm pa tawx Yesux ka ceucao mai pwi yumrhawm khawmuik heue. Phan yuh nan, viang koe pa na pa khawm miex ding ang ah, Yesux hoik of tau mai ex, teem coi ka ex ku jheeng jheeng heue.

KHAM MHAII SAKSE KA DAUX BAWG YAM PA DAWD

Krax pa kham mhai sakse, mawh ceu pa ting ceu tix ceu heue. Phan jhak daux lai (Mathiex 8:1-4) in, pon ti yaox grawng pwi sipawg (10) kaux, pon ti moi khaing jhawm saux tix kheu Yesux heue. Ka daux (10) kaux an, tix kaux deeh hoek ah lox ting bwanson ka Yesux, mai Yesux nhie nawh hu jhi sakse ka pwi tang kaux heue. Awm an, daux lai (Lukax 8:26-38) tiem ti deuh grawng pwi tix kaux pa laig phi pa seeing pa brai heue. Yam yaox nawh ka Yesux, mai Yesux ghreu phi pa seeing pa brai an lih hu, mai kawn an lih mawh pwi mhawm dom mawh dom an heue. Yam nawh mhaing ti hawt khaix Yesux, Yesux ang tawx akhwang, mai nhie nawh ing ka nyiex tix, mai krai pwi mhong grawng pa yuh Siyiex bwanson ka nawh, ting miex ding heue. Phan keud grawng in khankix, mawh pa koe alo Siyiex ka kawn pwi, sonsang chix kham sakse, mai krai grawng bwanson pa yuh Siyiex ka piang tokaux cao tix, mai ka piang ju pa im tix heue.

Ka daux bawg yan pa dawd tivud ngie, chix ti kham mhai sakse ka pwi ti kaux kaux heue. Yam kham maix mhai sakse yuh nan, caw ti ap pon tix ka Siyiex mhawm mhawm heue. Rawg bwan cen rhawm ka Siyiex, khaix an kham sakse ka pwi pa yaox maix pa

ot dex maix heue. Phan khum mhai sakse, pa caw ti deuh tawng koe (3) ceu heue.

(1) Sivoe ang nyang bax yaox ka Yesux, krax im ju maix koe yuh ka mawx? Rhawmrhi maix koe yuh ka mawx? Son ju khaix koe yuh ka mawx? Maix jah ti krai grawng an sivoe heue.

(2) Khaix an, krai grawng pa pon maix ka Cao khrit yuh ka mawx? Krai grawng Yesux paoh daux krax son maix yuh ka mawx?

Khaw ti ah nin:- Sivoe ang aux nyang pon ka Yesux, viang aux koc mau khri miex ding, ang sax nyawm rhawm tix bwang kawx, mai aux keud rhawm tix grawng Siyiex pa chix tawx krax nyawm rhawm ka aux heue. Yam an aux keud rhawm ka lox pa krai pwi tix kaux kaux grawng mawh Yesux Cao Taoh, mai aux sawg ti chawk pwi pa tawng khankix, aux yaox pwi pa chix krai tix kaux, nawh krai grawng Yesux ka aux, mai aux yummawm ka Yesux mawh Siyiex Cao Taoh tix tete telai heue. Khaix hoik yummawm aux mai khaix goik rieb ti teei Yesux mawh Cao Taoh tix, kheu aux hoik mawh kawn Siyiex, aux kiied sidaing gauxrhawm tete, aux ang lai koe pa lhat, aux ang lai koe pa khi, aux ang lai koe krax pa luxlax rhawm, aux pon pa nhim Yesux heue. Phan kham sakse baux ra-chix ti krai awm in plak piang heue.

3) Khaix an, krai kix mhong khaix hoik pon aux ka Yesux, mawh Cao Taoh tix, pie krax yum kawx aux ang lhat kah, kheu hoik koe ju aux ka daux taix Siyiex leeing ju leeing phan heue. Khaix hoik pon maix ka Yesux, koe krax pyaw yuh ka mawx, koe krax fahrhawm yuh ka mawx, koe krax kaux cong yuh ka mawx, krai kix mhong ka daux lox kham maix mhai sakse heue. In mawh krax blawng pa kham mhai sakse daux bwang yam pa dawd heue.

Phan maix sipub ka pwi tix kaux kaux pa hoik meed hoik tawng maix, ang lai nu sonsang kham maix mhai sakse ka nawh heue. Viang mawh nan, phan ang nyang sax meed sax tawng ka pwi

pa sipub maix an, krai lox yuh paox pie mai nawh sivoe, khaix an, baox krai grawng tokaux tix ceeix sonsang nie meed paox tix, mai jah ti kham mhai sakse khaix heue. Phan chix, krai lox dawd lox ngoing, chix ti krai hoik ka daux 2,3 minit ngie heue. Pa tiem ex ti deuh plak piang tan, mawh ngie krax blawng ngie khaing heue. Chix ti krai lox grawng pa tix ang ah, tang koe mai pa chix krai ex kaux mawx kaux an heue.

CEUCAO MAI PWI CEUCAO CAW TI HU TAWX LOX BWAU GAUXRHAWM GAUXRHII YAMIN

Can pwi pa koe daux ceucao khawmuik, can kraung pa koe daux ceucao khawmuik, can mau tan pa koe daux ceucao khawmuik, mawh pa hoik tawx pong Siyiex ka ceucao, ka ex, sonsang mawh pa yuh kaing Satsana mai sidiex gumloks bwan gauxrhawm gauxrhi heue. Can ceu ankix khawmuik khawm leeing, mawh cie Siyiex mai mawh son Siyiex heue. Siyiex tawx pong ceu in khankix ka ceucao, sonsang kieh nawh mawh pa yuh kaing li tawx lox bwan gauxrhawm gauxrhi heue. Siyiex yuh ceucao lih koe, sonsang mawh pa paoh siviex raoma son pwi haktiex heue. (Mathiex 16:18). Caw ti paoh yuh ka mawx kie nie, paoh kieh pwi tawng grawng krax moh Siyiex, mai grawng krax taoh Yesux khrit heue. Can kraung khrai, mau khri, nyien ma, jung pwi khawmuik, mawh pa caw ti kieh shiao son an heue.

Ceucao khawmuik, caw ti tang koe dee yuh kaing satsana heue. Caw ti tang koe pwi ploj hu krai lox bwan gauxrhawm gauxrhi heue. Phan ang koe yuh nan, ang tau ti chix kok mawh ceucao Cao khrit, kheu Cao khrit sum ceucao, son gumloks bwan gauxrhawm gauxrhi, 10 son tix son khawmuik, ang chix ti shiao son kaing tang ceu, lheu khaing pa yuh kaing satsana, mai pa team cao sidiex, mai pa team ka pwi hot sibhawm khankix heue. Phan shiao 10 son tix son, son kaing tang ceu, nawh hoik briex sin eis Siyiex, mai baox niied ti yuh con ka pa hoik tawx pwi, 10 son tix son an, son kaing

jhaw Satsana heue. Pa yuh nan hoik lud loe ka lox tawm Siyiex (2) ghlaulk heue. Sonsang hui ti yuh kaing satsana, mai krai lox bwan gauxrhawm gauxrhi yamin, pa ting ceu mawh in khankix heue.

- (1) Rawgbwan, mai twah pa ih rawg bwan
- (2) Tawx krax gau gumlox Siyiex ka pwi pa sang plo i hu
- (3) Taws kao son tix son mai teem coi ka pwi pa plo i hu
- (4) Plo i pwi yumrhawm, pa mawh kawncau mausoi khankix hu ka dee yuh kaing
- (5) Baox rawgbwan jheeng jheeng heue.

Ang lai khaw ti tok bawng yam rheung son gumlox bwan heue. Pwi pa rien ti sang laux leeing daux mawnarhok, kheu ang kix yaox ti mhong lox bwan gauxrhawm gauxrhi, kied nie tete telai heue. Phan ex tok bawg yam, mawh sang chix nawh lie? Phan pwii haktiex ton nie hoek ka daux krax prawng krax ciyang, mawh bee hlawm ceucao, mai pwi yumrhawm ang mawh lie? Mawh kheu nan, ceucao caw ti plo i pwi hu yamin heue. Pwi yumrhawm caw ti kaoh, mai hu yuh kaing yamin heue. Pa sax, sikaox num khaix, num tich ang lai chix ti krai lox an, kheu hoik tiem ti deuh daux phuk lai sigang khri ah nin:

Paw lai ting rhawm ti deuh rhawm son pa sax, grawhgrawng nawh ka daux ti singaix khaing, tag sang lih mawh yuh ka mawx, maix ang tawng. [Lox Kab 27:1].

Yamin, ceucao caw ti tawx krax gau ka pwi yumrhawm khankix, sonsang lih mawh kawncau mausoi cie Cao khrit heue. Phan hoik tawx krax gau tix bawg, baox tawx tix bawg, caw ti gau phuk lai sigang khri daux ceucao kubawg kuyam heue. Awm pa hoik tiem ex plak siveo tan, tawx krax gau daux nyiex bwan, phan ang mawh nan, daux nyiex ma, phan ang mawh nan dee khrawm pwi paox tix, ot tau dee mawx ang ah heue. Khaix an yuh cubcaw pa rawgbwan, pa mawh cubcaw pa ot rawg bwan son kaing jhaw pa rawgbwan, bawg tiblah rawgbwan twah pa ih pa un heue. Khaix an plo i pwi hu mai kieh kix hu krai lox bwan gauxrhawm gauxrhi heue. Can pwi pa ot plak khaix pa mawh pwi yumrhawm khankix, koe miex nyiex, koe miex kaux ang ah, rawgbwan son pwi pa plo i hu, mai son gumlox bwan gauxrhawm gauxrhi heue. Can pwi ceucao pa ot plak khaix khankix, caw ti tawx 10 son tix son tom khaw caw, mai mau tan tang ceu khankix heue. Can kaing in khankix, ang chix ti laux pie tibawg kawx, caw ti yuh ang jud ang jai heue.

Can ceu pa hoik krai ex, grawng kaing jhaw in kix khawmuik, mawh kaing pa caw ceucao mai pwi yumrhawm ti yuh, ang yuh ang chix heue. Siyiex sum ceucao piang haktiex, mai luug ti teei ka pwi yumrhawm, pa mawh kawncau mausoi khankix sonsang yuh kaing in heue. Phan ang mawh nan, pa koe ceucao mai kawn khrit, koe dee bleeh ka pa tix lie? Kheu hoik sidaing gla yuh ex bawg yam siveo in dix, ex caw ti kaoh mai hu yuh kaing yamin heue.

PA NHIE EX HU MAI PATIEBTIE EX ANG HU KA DEE, YUH KAING JHAW SIYIEX

Pa nhie ex hu, mawh alo Siyiex pa ting piang khawmuik heue. Alo Siyiex pa ting piang khawmuik an, ah nin: "Pex sawg meung Siyiex mai pa rah pa see nawh phaoka ha; mai Nawh tag baox tawx ceu in khawmuik ka pex heue." [Mathiex 6:33] Khaix an, Nawh baox tawx lox sibrawm ah nin: "Mawh kheu nan, pex hu; mai kieh ceu pwi khawmuik mawh kawncau mausoi Aux, mai baptis kix ka daux ceukanox Keeing Cao, Kawn Cao, mai Khwan Singax Singeh Cao heue. Mai gau kix kieh kix hawt yuh, ceu pa hoik nhie Aux ka pex khawmuik, mai jhak heue. Aux tag ot tau mai pex jheeng jheeng, tom sidah sidu hoek bawgyam sidah haktiex heue [Mathiex 28: 19-20].

Cao pa nhie ex hu ka dee yuh kaing, mawh Siyiex Cao pa phan pa yuh haktiex mai raoma heue. Kheu Nawh mawh Cao pa phan pa yuh kuceu khawmuik, Nawh pex ka kuceu khawmuik, mai Nawh ting pa piang kuceu khawmuik heue. Phan yuh nan, dee nhie

Nawh ex hu, kaing pa nhie Nawh ex yuh, mawh ceu pa yuh ka maws? pa kawn sang tiebtie ka ex lie pa tiebtie ex, ang yuh kaing jhaw Siyiex mawh kheu ex ang koe mau khri lie? Mawh kheu ex ang koe pa ih pa un lie? Mawh kheu lhat graung ex lie? mawh kheu iak rhawm ex mai khirhawm ex lie? ceu an khankix khawmuik ang doh mawh pa ting khaing Siyiex, ang doh mawh pa chix tiag cheu mai siawp sibrawm Siyiex heue.

Yami Mose ah tix ang pon hu, dee yuh kaing, jao khirhawm nawh grawng lhat nawh kix ang cu lox tix, Siyiex nhie nawh tik khaox tix ka piang tiex mai khaox gix nawh lih ti mawh siuing mai nhie nawh deeh teei sidax siuing an ka taix tix, mai nawh teei sidax siuing, mai deeh tieh ti mawh khaox gix ang mawh lie? Ceu pa cau Siyiex ex yuh, mai krax pa cau nawh ex hu, ang chix ti teh thiang ka grawng tix ceu kawx, kheu Siyiex ang mawh pa awm kawn pwi heue. Nawh Cao hoik dha ti tawng ka ex torn yan ex ang nyang bax lih mawh nex nham ka daux vaig miex tix heue. [Yeramix 1:5] Mawh kheu nan, pa theet Nawh ex hu ang doh chix koe krax som nai tix bwang kawx, kheu kawn pwi ang yumrhawm ka Nawh, tom ang cu ti hu krax pa nhie simiang Siyiex, mai lhat ngie ka pa tiebtie, pa mawh ceu pa ang koe sibrawm ti sang chix yuh tidtix, tix ceu kawx heue. [Lih Hu 4:2]

Khaiix an, diech doh keud ti yaox grawng Yeramix, sidien ka lox Siyiex, grawng mawh nawh kawn nyawm awn ju heue. Siyiex ang cu nawh sidien ka lox Tix. Kheu Siyiex ot mai nawh, mai tawx sibrawm pu pex piang pwi meung haktiex ka nawh ah nan heue. [Yeramix 1:7]. Jao pa ang chix ti sidien ka lox Siyiex kheu mawh Nawh lox pa pex ka kuceu, pa ting sibrawm piang kuceu, pa chix yuh kuceu, pa kaux sijax mukheu, pa ang chix pie chix lhen, pa ang chix tieh chix feen heue. Mawh kheu jao an, ang chix ti sidien kah heue. Sonsang yuh ex kaing jhaw Siyiex, bwang tiblah, ex ang pon yuh jao ex ang koe mau khri, bwang tiblah ex ang pon hu jao ang koe pwi teem plak nyiemxa tix, bwang tiblah ex ang pon yuh jao khirhawm ex ka ang chix yuh kaing, bwang tiblah khirhawm kheu jao lhat ex ti

ang pex ah, pex thong ka pwi, bwang tiblah, ex khirhawm jao singai ex khaing nyiemxa kawn praix tix heue. Ceu pa khirhawm ex in khawmuik, ang mawh pa chix ti silah ka siawp sibrawm Siyiex, pie tix ceu kawx heue.

Pa nhie ex hu dee yuh kaing, mawh cao pa tawx bwan son pa lang teung ting khaing kuceu, pa mawh bwan son, ju pa im leeing ju leeing phan heue. Pa tiebtie ex ang hu dee yuh kaing, mawh phicaox cao nyaw glaw, pa mawh cao tuktiai ka alo Siyiex heue. Phicaox Satan mawh pa jech nyaw kawn pwi ka kraung khrai haktiex, mai krax gauxrhawm haktiex ku ceu heue. Phicaox Satan nyaw glaw kawn pwi ka alo nex nham, mai ka krax ih krax un pa yoek pa awp, ka piang haktiex in, tom nhie nawh hu daux mawnarhok dee kharhawm leeing ju leeing phan heue.

Phan mawh cao pa nhie ex hu, mawh Cao Taoh simiang Yesux khrit, Cao pa pex ka krax yum, Cao pa pex ka meung yum, mai Cao pa tawx ju leeing ju leeing phan ka pwi pa yumrhawm ka Nawh khawmuik heue. Nawh Cao kok ka kawn pwi, sonsang pon kawn pwi krax taoh, mai ju pa im leeing ju leeing phan heue. Nawh Cao kok ka kawn pwi, sonsang pon kawn pwi bwanson krax caoxrhawm Siyiex heue.

Phan yuh nan, pa nhie ex hu mai pa tiebtie ex ang hu, ra kaux in, mawh sang cu nghiet ex ka lox pa nhie ex hu lie? Phan ang mawh nan, mawh sang cu nghiet ex ka lox pa tiebtie ex ang hu dee yuh kaing Siyiex lie? Pa nhie ex hu mawh son ju pa gauxrhawm leeing ju, mai pa tiebtie ex ang hu mawh son krax nyawm rhawm haktiex tivid khaing ngie, mai dee sidah, mawh krax kharhawm kharja daux meung mawnarhok leeing ju leeing phan heue. [Plak Jhi 21:8].

Phan ex ceucao mai pwi yumrhawm khankix rien ti sang hu dee pa cau Siyiex ka ex daux kaing jhaw Nawh Cao, ex yie chix keud ngie grawng pa ang koe mau khri, mai ang kub krax chix krax tawng, mai yie chix keud krax chix krax tawng, mai yie chix keud ngie ceu pa iak riangrao plak tokaux cao tix heue. Ex ang chix cu ti

yumrhawm ka lox sijax mukheu Siyiex pa ting piang khawmuik, kheu cien ngai jiang ex plak nex nham haktiex heue. Viang ex hoik tawng grawng pa ting sibrawm Siyiex piang khawmuik kawx, kheu jheeh ngaw phicaox ex ot plak nex nham, ex tom ang chix kaux rhawm ka Siyiex pa ting siawp sibrawm heue. Phan rien ti yuh kaing pa mhawm son meung Siyiex tix ceu ceu, mai phan krax ngaw glaw, mai pa tiebtie hoek ka piang ex, ex yie chix piawm ka lox sijax mukheu Siyiex, mai ka sibrawm Nawh Cao pa kiied ting kiied lhaong piang khawmuik heue. Awm pa Siyiex nhie ex hu daux kaing jhaw ceu pa mhawm ku singaix, phicaox kawx tiebtie ka ex ang hu ku singaix, mai jheeh nyaw ex hu ka daux dee laux lak pak leeing daux meung mawnarhok leeing ju leeing phan heue.

Viang ex ang koe tidtis kawx, phan cu lox Siyiex, kheu Siyiex ot mai ex, ex tag sang pon ceu pa lo tix tete heue. Cao sidiex cao gau mai kawncau mauso i khawmuik, kawx cu lox Siyiex dee krai gumlox bwan gauxrhawm gauxrhi, mai ceucavo kharwm pwi ceucavo kawx, cu nghiet ka lox Siyiex, ot plak khaix, rawgbwan mai sau 10 son tix son, mai teem ka pwi pa ploj hu, phan yuh nan, kaing jhaw Siyiex ang haok huan ang doh chix heue. Viang pwi ploj hu koe kawx, kheu krax joh jhan son kix ang koe grum naog, ang chix lih ti mawh kaing heue. In koe beelh glawm ka piang ceucavo mai pwi ceucavo khawm ex cao sidiex cao gau khawmuik khawm leeing heue. In mawh daux krax pa hoik jhi Siyiex ka ex heue.



